

Golle Nulaabe

¹ Banndam Tawfilus, e ley dewtere am aran-deere ndeen, mi winndii ko Iisaa fuddi gollude e waajaade fuu, ² faa nyannde yeentinaa ndeen. Gilla nde o yeentinaakano ndeen o haaldii e nulaabe be o subinoo been, o tindiniri dum'en e baawde Ruuhu Ceniido.

³ Caggal nde o torranoo ndeen, o hollitii be hoore makko. O hollirii be e daliiliiji keewdi imo wuuri. O wondi e mabbe balde capande nay, imo haalana be kabaaru laamu Laamdo. ⁴ Nyannde gomma imo nyaamda e mabbe, o tindini be taa be mbodfoo Urusaliima, ammaa be kedoo aadi Baabiwo ndi be narri mo ndiin.

O wi'i:

⁵ —Yaayaa na lootirannoo yimbe batisima e ndiyam, de onon, ley balde seeda, on lootirte batisima e Ruuhu Ceniido.

⁶ Be fuu be kawriti, ibe yama mo, ibe mbi'a:

—Joomiraado, wo joonin ngartirtaa laamu Israa'iila naa?

⁷ Iisaa jaabii be, wi'i:

—On mbaawaa anndude jamaanuuji e wakkatiiji di Baabiwo darniri baawde muudum. ⁸ Ammaa nde Ruuhu Ceniido wari jippii e moodon fu, on keban baawde, de laatodon seedee'en humpitoo be kabaaru am ley Urusaliima e ley leydi Yahuudiya fuu, kam e Samariya, faa to adunaaru haadī.

⁹ Nde o haalnoo dum ndeen, o yeentinaa. Be tiggiti, ibe ndaara faa ruulde suddi mo.

10 Do 6e tiggitotoo kammu i6e ndaara imo yeentinee doon, inan wor6e dido 6e kaddule daneeje punti, ndarodii e mabbe, **11** mbi'i:

—Galilinkoo6e, ko wadi de ndaridon, odon tiggito kammu? Iisaa ittaado e moodon de yeentinaa dow kammu oon wartan. O wartiran hono no njiirudon imo yeentiniraa dow kammu noon.

12 Ndeen nulaabe been ndilli waamnde wi'eteende Jaytun doon, 6e njecpii Urusaliima. Toon e Urusaliima na wada kilomeetere gooto.

13 Nde 6e njottinoo fu, 6e yeenjowi suudu dowuuru to 6e mbeerunoo toon. Piyeer e Yuhanna e Yaakuuba e Andire e Filipu e Tomaa e Bartolome e Matta e Yaakuuba 6ii Alfaa e Simon kiranoowo suudu baaba e Yahuuda 6ii Yaakuuba fuu tawaama doon. **14** Be fuu 6e kawriti, 6e laatii bernde wootere, i6e tinnii e du'aare, kambe e minyiraabe Iisaa e Mariyama inna Iisaa e rew6e wobbe.

No Matiyas loomtiri Yahuuda

15 Ley balde deen, goondinbe ko wadata hono hemre e noogay kawriti. Piyeer ummii, darii hakkunde mabbe, wi'i:

16 —Sakiraabe, ina tilsi ko woni e Binndi diin tabita dow Yahuuda, kolludo nanngube Iisaa laawol oon. Ruuhu Ceniido haalii dow majjum e hunnduko Daawda. **17** Yahuuda na hiisenoo e meeden, o hebii ngedu makko e gollal ngal nglantan Joomiraado. **18** Kaalisi mo o yeenanoo e gollal makko bonngal ngaal, o soodi dum ngesa. O bo66ii ley magga, reedu makko seekii, teketti makko fuu mburtii, ndufi. **19** Yimbe Urusaliima fuu nani dum. Dum wadi de 6e inndiri ngesa ngaan

Akeldama. E ley demngal maabbe idum fiirta «Ngesa Yiiyam». ²⁰ Si goonga du, dewtere Jabuura haalii e dow majjum, wi'i:

«Wuro makko laatoo winnde,
taa fay gooto hoda toon.» Ina winndaa du:

«Goddo loomta mo.»*

²¹ Woodi ndelle, tilay goddo loomta mo, tawee wo gondudo e meeden ko juuti wakkati mo Joomiraado men Iisaa wondunoo e meeden ndeen.

²² Dum wo gilla nde Yaaya lootunoo mo lootagal batisima faa yaade nyannde nde o yeentinaa dow kammu ndeen. Gorko oon latodoto e meeden seedee ummitagol Iisaa.

²³ Ndeen be ndarni worbe dido: Yuusufi bi'eteedo Barasaba coowirteedo Yustus, kam e Matiyas. ²⁴ Be ndu'ii, be mbi'i:

—Joomiraado, aan annudo berde yimbe fuu, faamin min mo cubidaa e bee do dido ²⁵ faa ronndoo gollal nulal, loomta Yahuuda joppudo dum de yehi nokku to jeyi yahude toon.

²⁶ Be ngadi cumnal maabbe. Cumnal ngaal hawri e Matiyas. O hiisodaa e nulaabe sappo e ngo'o been.

2

No Ruuhu Ceniiido jipporii dow goondinbe

¹ Nde iidi benndal alkama warnoo ndeen,* tawi goondinbe Iisaa been fuu ina kawriti nokku

* **1:20** Jabuura 69.26, 109.8. * **2:1** Innde iidi benndal alkama wo «Pentekosta» ley Geresankoore. Inde fiirta «capande joy», sabo ina waadee balde 50 caggal iidi Faltagol. Wo wakkati mo biibbe aawitirdi artiindi tayetee faa cakkanee Joomiraado.

gooto. ² Wakkati gooto, sawtu ga'udo hono henndu mawndu yuuri dow kammu, heewi suudu do be njoodii doon fuu. ³ Ko wa'i hono demle yiite ni bangani be. De peccii, de njowii dow mono e mabbe fuu. ⁴ Be fuu be keewi Ruuhu Ceniido, be puzzi haalude demle janane no Ruuhu oon hokkiri be kaalda noon.

⁵ Tawi worbe Alhuudiyankoobe hulbe Laamdo yuurube e leyde adunaaru fuu ina njoodii Urusaliima. ⁶ Nde sawtu oon wadunoo ndeen, jamaa oon fuu hawriti. Dum jiiyii hakkillooji mabbe, sabo mono fuu nanii demngal[†] muufum ina haalee. ⁷ Be fuu be mbemmbaa, dum haaynii be, ibe mbi'undura:

—Haaloobe be fuu nganaa Galilinkoobe naa?
⁸ Ndelle, noy mono e meeden fuu nanirta ko be kaalata e demngal ngal muyni? ⁹ En Partiyankoobe e Mediyankoobe e Elamiyankoobe, en joodiibe Mesopotami, kam e Yahuudiya e Kapadokiya e Ponta e Aasiya ¹⁰ e Firigiya e Pamfiliya e Misira e leyde sera Libiya dakkol Sireene. Wobbe meeden yuuri Roma. En Alhuudiyankoobe, kam e naatube diina Alhuudiyankoobe. ¹¹ Wobbe katin yuuri Kereta, wobbe yuuri leydi Arabiya. Ammaa dum e laataade fuu, en fuu eden nana ibe kaala haala golleeji mawdi di Laamdo wadi diin. Ibe kaala dum fuu e demle meeden!

¹² Dum haaynii be be fuu, dum habbi be ko'e, ibe yamundura:

—Dume woni maanaa majjum?
¹³ Wobbe ina njalnoroo goondinbe been, ina mbi'a:

† 2:6 Maanaa demngal do wo sii haala.

—Be kaaru doro de 6e culii!

No Piyeer waajorii jamaa oon

¹⁴ Ndeen Piyeer darodii e sappo e ngo'o been,
6anti daande muudum, de wi'i jamaa oon:

—Onon Alhuudiyankoobe e joodiibe Urusali-
ima fuu, kettinee haala am de paamon kabaaru
gadudo oon. ¹⁵ Yimbe 6e nganaa suliibe hono no
miilortodon ni. Joonin fay yamnde jeenay beetee
faltaaki, sakko neddo yara faa suloo. ¹⁶ Ammaa
dum warii faa tabintina ko annabi Jowiila wi'i:

¹⁷ «Laamdo wi'ii:

E ley balde cakitotoode de
mi jippinan Ruuhu am dow tagaabe fuu.

Bibbe moodon worbe e rewbe
kaaliran annabaaku.

Jokolbe moodon nji'an holleede,
nayeebe moodon koydinte.

¹⁸ Woodi golloobee am worbe e rewbe du,
mi jippinan Ruuhu am dow muubben e ley
balde deen,
6e kaaldan annabaaku.

¹⁹ Mi wadan kaayefiji dow kammu,
mi wadan maandeeji kaayniidi dow leydi,
di laatoo yiyyam e yiite e cuurki.

²⁰ Fadde nyalaande gartol Joomiraado mawnde
teddunde ndeen warude,
naange nibbinte,
lewru du wojjan hono no yiyyam ni.

²¹ Ndeen, neddo fuu noddudo innde Joomiraado
hisinte.»‡

²² Piyeer wi'i katin:

‡ **2:21** Jowiila 3.1-5.

—Israa'iilankooōe, kettinee haalaaji di: Iisaa Nasaraatuuj oon wo neddo mo Laamdo laabinani on wo yuurdo e muudum. Laamdo hokki dum baawde, hokki dum waafude kaayeefiji e maandeeji kaayniidi hakkunde moodon, hono no onon e ko'e mon anndirdon ni. ²³ Neddo oon, Laamdo muuynoo gilla arande wattee e juude mon. Onon le, on ndunjanake mo yimbe 6e anndaa jamirooje, on tontii mo, on mbarii mo. ²⁴ Ammaa Laamdo iirtinii mo, itti mo e naawalla maayde, sabo maayde ndeen waawaano tiigaade mo. ²⁵ Si goonga du, inan ko Daawda haali dow makko, wi'i:
 «Wakkati fuu mido yi'a Joomiraado na wondi e am.

Imo woni gere nyaamo am,
faa taa mi diwna kulol.

- ²⁶ Saabe majjum bernde am seyake,
demngal am na mana,
faa banndu am du waaltoo dow jikke celludo,
²⁷ sabo a yoppataa yonki am hakkunde maaybe,
a accataa Ceniido maa oon nyola.
²⁸ A anndinii kam laabi nguurndam,
a hebbinan kam seyo sabo ada wondi e am.»§
- ²⁹ Piyeer 6eydi katin, wi'i:

—Sakiraabe, mido haalana on laabgal haala maami en Daawda: o maayii, o uwaama, saabeere makko ndeen ina woni do meeden do faa hannden. ³⁰ Ammaa wo o annabaajo, imo anndi Laamdo hunanake mo gooto e taaniraabe makko loomtan laamu makko. ³¹ O yi'ii ko warata, o haali haala ummitagol Almasiihu. O wi'i yonki muudum accataake hakkunde maaybe, banndu muudum du nyolataa. ³² Oon woni Iisaa

mo Laamdo ummintini, min fuu minden ceedii.
 33 Laamdo bantii mo, heedinii mo gere nyaamo muudum. O hebi e Baabiiwo Ruuhu Ceniiido hono no aadorinoo noon, o saaki dum. Joonin odon nji'a dum, odon nana dum. 34 Sabo Daawda meedaay yeentude dow kammu, ammaa wi'ii:

«Joomiraado wi'i Joomam:

Jooda gere nyaamo am,

35 faa mi wada njaabaa waybe ma.»*

36 Lenyol Israa'iila fuu tannyora: Iisaa mo tontudon e leggal palaangal oon, Laamdo wadii dum Joomiraado, wadii dum Almasiihu.

Haala kawrital artiibe goondinde

37 Nde be nannoo haala kaan ndeen, ka yuwi berde mabbe sanne, be mbi'i Piyeer e nulaabe hed-diibe been:

—Sakiraabe, dume min kaani waafude?

38 Piyeer jaabii be, wi'i:

—Tuubee, gooto moodon fuu lootiree lootagal batisima e innde Iisaa Almasiihu, faa lutti moodon njaafee. Ndeen Laamdo hokkan on Ruuhu Ceniiido. 39 Sabo Laamdo wadanii on aadi, onon e biibbe moodon e yimbe wodduube fuu. Indi woodani neddo mo Laamdo Joomiraado meeden noddi fuu.

40 Caggal duum, Piyeer gongini be haalaaji goddi keewdfi, ina waajoo be, ina wi'a:

—Ndeenee ko'e mon e yimbe jamaanu oonyiido o.

41 Jaabibe haala makko been lootaa lootagal batisima. Nyannde ndeen, yimbe hono ujunaaje tato naati e kawrital goondinbe ngaal.

* 2:35 Jabuura 110.1.

42 Ibe tinnoo e waaju nulaabe been, ibe nanngunduri e gondal goondinbe ngaal, ibe keltoo buuru,[†] ibe ngadida du'aawuuji. **43** Kulol naati e mono fuu, sabo nulaabe been ina ngada kaayefiji e maandeeji kaayniidi keewdi. **44** Goondinbe been fuu na kawti. Ko be njogii fuu, wo be kawtu. **45** Ibe conna jawdi mabbe, ibe kokka mono fuu ko haajaa. **46** Nyannde fuu be kawritan ley suudu dewal mawndu nduun, ibe laatii bernde wootere. Ibe keltoo buuru, ibe nyaamda ley cuudi mabbe e seyo e berde laabude. **47** Ibe njetta Laamdo, yimbe fuu ina njidi be. Nyannde fuu Joomiraado ina beydana kawrital ngaal hisinaabe.

3

No Piyeer selliniri bonnguujo e no waajorii yimbe

1 Piyeer e Yuhanna naaddi ley suudu dewal mawndu wakkati du'aare yamnde tati. **2** Tawi gorko dimdaado e bonngaaku ina yaaree to dammbugal suudu dewal mawndu bi'eteengal Dammbugal Lobbal. Nyannde fuu yimbe makko ina njoyyina mo doon faa o garbina naatoobe suudu dewal mawndu been sadaka. **3** Nde o yi'unoo Piyeer e Yuhanna ina naata ndeen, o garbini dum'en. **4** Be ndaari mo, de Piyeer wi'i:

—Ndaaru min!

5 Gorko oon ndaari be faa woodi, sabo na miilii hemrude be huunde. **6** De Piyeer wi'i:

[†] **2:42** Heltaade buuru ina firta rewruude Laamdo hiraande seniinde.

—Mi walaa cardi, mi walaa kañje, ammaa mi hokkete ko njogiami duum: e dow innde Iisaa Almasiihu Nasaraatujo oon, umma yahu!

⁷ O nanngi junngo muudum nyaamo, o ummini dum. Wakkati gooto, koyde muudum e kolbule mum celli. ⁸ O gurbitii, o darii, imo yaha! O naatidi e maññe ley suudu dewal mawndu nduun, imo yaha, imo fitta, imo yetta Laamdo. ⁹ Yimbe been fuu nji'i mo, imo yaha, imo yetta Laamdo. ¹⁰ Be annditi wo kanko joodotonoo to dammbugal bi'eteengal Lobbal ngaal ina garbina. Kaayeefi e wemmbere nanngi ñe sanne saabe ko o hebi duum.

¹¹ Neddo oon na takkii Piyeer e Yuhanna doon sanne. Yimbe been fuu ndoggi, kawriti e maññe to danki mbi'eteeki danki Suleymaana no huunde nde foti haaynaade ñe. ¹² Nde Piyeer yiinoo dum fu, wi'i yimbe been:

—Israa'ilankooÑe, ko wadi de idum haaynii on? Ko wadi de odon tufi min gite? Si goonga, wanaa baawde amin naa kulol amin Laamdo wadi de gorko o ina yaha e koyde muudum. ¹³ Laamdo Ibrahiima e Isiyaaka e Yaakuuba, Laamdo maamiraabe meeden, teddini golloowo muudum Iisaa. Onon kaa, on ngattii mo e juude laamu, on calake mo yeeso Pilaatu, fay si taweede Pilaatu ina yidi yoofude mo. ¹⁴ Onon, on calake Ceniido Ponnditiido oon. On nyaagake njoppanedon gaddo warhoore. ¹⁵ Jom Nguurndam oon mbarudon. Ammaa Laamdo iirtini mo e maayde. Misien ceedii dum. ¹⁶ Wo saabe goondinal Iisaa e baawde innde muudum wadi de gorko o dadí. Odon nji'a mo,

odon anndi no o worrunoo du. Ayyo, hoolaare Iisaa ndeen wadi de o laatii celludo kibbudo.

¹⁷ Woodi, sakiraabe, ko onon e hooreebe moodon ngadudon Almasiihu duum, mido anndi wo saabe majjere tan. ¹⁸ Ammaa hono noon Laamdo tabintiniri ko annabaabe muudum fuu kaali duum: Almasiihu torroto. ¹⁹ Ndelle tuubee, ngarton, faa lutti moodon mooytee. ²⁰ Ndeen Joomiraado waddanan on wakkatiji powtiri e ndakam. O nuldan on Almasiihu mo o subanii on gilla arande, oon woni Iisaa. ²¹ Ina tilsi o heddoow dow kammu faa nde Laamdo heydintini kulle deen fuu, no annabaabe seniibe been kaaldunoo haala majjum gilla arande noon.

²² Sabo Muusaa wi'ii: «Laamdo Joomiraado moodon nuldan on annabaajo hono am, sakiike moodon. Njabon huunde fuu ko o haalanta on. ²³ Neddo fuu mo jabanaay annabaajo oon, yaltinte e yimbe Laamdo, de halkee.»*

²⁴ Gilla e Samuwiila faa e annabaabe warbe caggal muudum, be fuu be kaalii haala nyalaade de. ²⁵ Onon ngoni ronoobe annabaabe been, onon ngoni ronoobe amaana mo Laamdo nanngani maamiraabe men been nde wi'unoo Ibrahiima: «Wo e yuwdi maa lenyi adunaaru ndu fuu kebirta barke.»†

²⁶ Nde Laamdo ummintinnoo Iisaa golloowo muudum oon fu, wo e moodon o artii nulde duum. O nuli duum faa o barkina on e ley ko o ooncata mono fuu yoppa golleeji muudum bondi.

* **3:23** Fillitagol Tawreeta 18.15, 18, 19. † **3:25** Fuddoode 12.3.

4

*Kabaaru Piyeer e Yuhanna yeeso waalde
Saahiibe*

¹ Nde Piyeer e Yuhanna kaaldannoo e yimbe been ndeen, almaami'en e mawdo ndaaroobe suudu dewal mawndu, kam e Saduki'en, ngari to maabbe. ² Ibe mettaa sabo Piyeer e Yuhanna ina njanngina yimbe ina mbaajoo dum'en Laamdo umminan maaybe sabo iirtinii Iisaa. ³ Be nanggi been, be ommbi dum'en e kasu faa jaango muudum, sabo tawii hiiriino. ⁴ Ammaa yimbe heewbe e nanbe waaju oon been ngoondinii, faa wadi hono worbe ujunaaje njoyo.

⁵ Jaango majjum, hooreebe mabbe e mawbe e jannginoobe Tawreeta kawritowi Urusaliima. ⁶ Almaami Mawdo bi'eteedo Annas na tawaa toon, woodi du Kayafas e Yuhanna e Alesandere e yuwdi hooreebe almaami'en ndiin fuu na toon. ⁷ Be ndarni Piyeer e Yuhanna yeeso mabbe, be yami dum'en e dow baawde deye naa innde ndeye be celliniri bonnguujo oon.

⁸ Ndeen, Piyeer keewdo Ruuhu Ceniido wi'i be:
—Hooreebe yimbe e mawbe, ⁹ si on yamtii min hannden moyyere nde min ngadani bonnguujo o fu, on yamii min no o danniraa, ¹⁰ odon njeyi anndineede dum do, onon e Israa'iilankoobe fuu: Wo saabe Iisaa Almasiihu Nasaraatuuj gorko o darorii yeeso moodon wo dadudo. On tontiino Iisaa oon, ammaa Laamdo iirtinii dum. ¹¹ Kam woni mo Joomiraado wi'i:

«Hayre nde onon nyibooibe calidon,
wo kayre laatii hoore nyimngo ngoon.»*

* ^{4:11} Jabuura 118.22.

12 Kisindam hebirtaake e goddo fay gooto. Laamdo hokkaay yimbe innde wonnde fuu ley adunaaru ndu faa kebiren kisindam.

13 Nde waalde Saahiibe yi'unoo cuusal Piyeer e Yuhanna fu, dum haaynii 6e, sabo 6e paamii been wo laddee6e, nganaa jaangub6e. Be annditi been ina ngondunoo e Iisaa. **14** Ammaa nde 6e njiinoo gorko cellinaado oon ina darii yeeso mab6e, walaa fuu ko 6e mbaawi yeddude. **15** Be njamiri Piyeer e Yuhanna njalta sarorde ndeen. I6e ndawrida, **16** i6e mbi'a:

—Dume ngadeten wor6e dido 6e? Si goonga, won6e Urusaliima fuu tabintinii 6e ngadii maande haayniinde. Katin du en mbaawaa yeddude dum. **17** Joonin kaa, dum haanaa sankitaade e ley yimbe. Ndelle cappanen 6e, ka6en 6e haalande fay gooto innde Iisaa ndeen.

18 Ndeen 6e nodditi dum'en katin, 6e cappani dum'en taa mbaajoo, taa njanngina innde Iisaa fey. **19** Ammaa Piyeer e Yuhanna njaabii 6e, mbi'i:

—Onon e ko'e moodon ndaaree ko buri woodde yeeso Laamdo, min dowtanoo on, naa min dowtanoo Laamdo? **20** Minen kaa, min mbaawaa selude haalde ko min njiiri gite amin e ko min naniri noppi amin.

21 Be cappani dum'en katin, de 6e njoofi dum'en. Be kebaay fuu ko 6e njukkoroo dum'en, sabo yimbe been fuu na njetta Laamdo dow ko wadi duum. **22** Danniraado haaynde ndeen oon, duubi muudum ina buri capande nay.

23 Nde Piyeer e Yuhanna njoppanoo ndeen, njecpii to yimbe mu6ben, kaalani 6e ko hooreeb6e almaami'en e maw6e mbi'i dum'en fuu. **24** Nde

6e nannoo dum ndeen, 6e yepti daade mabbe to Laamdo e bernde wootere, 6e mbi'i:

—Laamdo Joomiraado, aan tagi kammu e leydi e maayo manngo e ko woni e muubben fuu. ²⁵ Aan du haaliri dow baawde Ruuhu Ceniido e hunnduko maama amin Daawda, golloowo maa oon, de wi'i:
«Ko saabii de lenyi na peekoroo mawnitaare?

Ko saabii de yimbe na miiloo miilooji boli?

²⁶ Kaanankoobe adunaaru ndaranake wolde, ardiibe kawriti faa kabaa
e Joomiraado e Almasiihu muudum.»†

²⁷ Dum wo goonga, sabo ley ngalluure ndeen Hirudus e Pontiyu Pilaatu nanngunduri e Israa'iilankoobe e lenyi goddi faa kabaa e Iisaa, golloowo maa ceniido mo cubidaa oon. ²⁸ Hono nii 6e ngolliri ko podinodaa baawde maa e muuyde maa fuu. ²⁹ Joonin Joomiraado, ndaar gidi‡ mabbe dii. Kokkaa golloobe maa waajoraade haala maa e cuusal manngal. ³⁰ Bangin baawde maa, ndannaayawbe, ngadaa maandeeji kaayniidi e kaayeefiji saabe Iisaa, golloowo maada ceniido oon.

³¹ Nde 6e tilinoo nyaagaade Laamdo ndeen, nokkuure do 6e kawriti doon dimmbii. Be fuu 6e kebbinaa Ruuhu Ceniido, i6e mbaajoo konngol Laamdo e cuusal.

No goondinbe been kawtiri huunde fuu

³² Jamaa goondinbe oon fuu wo bernde wootere, wo hakkillo wooto. Ko 6e njogii fuu 6e kawtu. Fay gooto mabbe wi'ataa fay huunde e jawdi muudum.

³³ Nulaabe been ina ceedoroo ummitagol Iisaa Joomiraado e baawde mawde. Moyyere mawnde

† **4:26** Jabuura 2.1-2. ‡ **4:29** Maanaa gidaade wo hulbinirde e haalaaji.

ina woni e maabbe be fuu. ³⁴⁻³⁵ Fay gooto maabbe waasaay, sabo jogiibe gese e galteeji fuu ina conna, ina ngadda ceede deen to nulaabe. Ndeen mono e maabbe fuu ina hokkee ko haajaa.

³⁶ Ina woodi doon goddo bi'eteedo Yuusufi, mo nulaabe been coowirannoo Barnabas (dum na fifta «Bii cellinoowo berde»). Wo o yuurudo e lenyol Lewi, § dimaado Kipirus. ³⁷ Imo woodunoo ngesa. O sonni nga, o waddi ceede deen to nulaabe been.

5

No Ananiyas e Safira penirani Ruuhu Ceniido

¹ Gorko gomma bi'eteedo Ananiyas e deekum Safiira, kam'en du conni ngesa muubben. ² O suudi feccere ceede deen, tawi deekiiko oon ina anndi. O yaari ko heddii duum, o hokki nulaabe been. ³ Piyeer wi'i:

—Ananiyas, ko wadi de Seydaani heewi bernde maa faa penandaa Ruuhu Ceniido, cuududaa fecere coggu ngesa ngaan? ⁴ Wo aan e hoore maa jeynoo nga. Ko connudaa nga duum du, wo aan jeyi ceede deen. Ndelle ko wadi de anniyidaa wadude ni? Wanaa yimbe penandaa koy, wo Laamdo penandaa!

⁵ Nde Ananiyas nannoo haala kaan fu, saami, maayii. Dum laatanii nanbe dum been fuu kulol manngol. ⁶ Jokolbe ummii, ngatti mo e kasanke, ndonndii mo, njaltini yaasin, uwi mo.

⁷ Hono leeruuji tati caggal duum, deekiiko naati, tawi nanaay ko wadi duum. ⁸ Piyeer wi'i mo:

§ **4:36** Yimbe lenyol Lewi ngonnoo ndaaranoobe golle dewal Laamdo gilla e jamaanu Muusaa.

—Haalanam yalla wo dum jaati connudon ngesa moodon ngaan naa?

O wi'i:

—Ayyo, nii foti.

⁹ Ndeen Piyeer wi'i mo:

—Noy de aan e gora dewrudon faa ndaartindodon Ruuhu Joomiraado? Inan, uwoybe gora ina ngara, faa be njaare, aan du!

¹⁰ De wakkati gooto, kanko du, o saami yeeso Piyeer, wo o maaydo. Jokolbe been naati, tawi o maayii. Be ndonndii mo, be njaltini yaasin, be uwi mo dakkol goriiko. ¹¹ Kulol manngol nanngi kawrital goondinbe e nanbe dum fuu.

No nulaabe been ngolliri maandeeji kaayniidi e kaayefiji

¹² Nulaabe been ina ngada maandeeji kaayniidi e kaayefiji keewdi hakkunde yimbe. Tawi goondinbe been fuu ina kawrita ley danki Suleymaana kiin, be fuu be bernde wootere. ¹³ Yimbe heddiibe been, fay gooto e mubben suusaa hawtude e mabbe. Ammaa yimbe doon na teddina be. ¹⁴ Goondinbe Joomiraado been ina beydoro yimbe heewbe, worbe e rewbe. ¹⁵ Faa dum hewtini yimbe waddoyde nyawbe, ibe mburtina dum'en dow laabi, ibe mballina dum'en e dow leese e daage, faa nde Piyeer waroyi fu, dowki muudum meema yoga mabbe. ¹⁶ Yimbe heewbe yuuri e gure piliiide Urusaliima, ngaddi nyawbe e wondube e ginnaaji. Been fuu ndannaa.

No nulaabe been torriraa

¹⁷ Ndeen, Almaami Mawdo e battaa'en muudum been, dum woni Saduki'en, keewi kiram. ¹⁸ Be

nanngi nulaabe been, 6e ommbi dum'en ley kasu.
19 Ammaa e jemma oon, maleyka Joomiraado
 gooto omoti dammbude kasu deen, wurtini 6e, wi'i:

20 —Njehee ndarowee ley suudu dewal
 mawndu toon, mbaajodon yimbe haala
 nguurndam goongalajam dam fuu.

21 Nde 6e nannoo ko maleyka oon wi'i fu, 6e
 njehi, 6e naatowi suudu dewal mawndu nduun
 gilla fajiri, i6e njanngina.

Ndeen Almaami Mawdo oon e battaa'en
 muudum noddi waalde Saahii6e e mawbe
 Israa'iila fuu batu. Be njamiri nulaabe been
 ittowee to kasu toon, ngaddee. **22** Ammaa nde
 doomoobe been njottinoo ndeen, tawaay 6e e ley
 kasu toon. Be njecpii, 6e kaaltani waalde Saahii6e
 been, 6e mbi'i:

23 —Min tawii kasu nguun ina uddii ina sokii,
 doomoobe been ina keddi yaasin ina kuccunduri
 e dammbude deen, ammaa nde min udditinnoo
 ndeen, min tawaay fay gooto ley toon.

24 Nde mawdo doomoobe suudu dewal mawndu
 oon e hooree6e almaami'en been nannoo dum fu,
 6e mbemmbaa, 6e kunngii faamude fuu ko dum
 waawi laataade. **25** Ndeen goddo wari, humpiti 6e,
 wi'i:

—Inan, wor6e 6e ommbunodon ley kasu been,
 ina ndarii ley suudu dewal mawndu, ina njanng-
 ina yimbe!

26 Ndeen, mawdo doomoobe oon yaadi e
 doomoobe been, ngartiri nulaabe been. Ammaa
 6e ngadiraay dum doole sabo i6e kula taa yimbe
 padda 6e kaaye.

²⁷ Nde 6e ngartirnoo nulaabe been fu, 6e ndarni dum'en yeeso waalde Saahiibe ndeen. Almaami Mawdo oon yami 6e, ²⁸ wi'i:

—Min cappanii on sappannde sattunde, taa mbaajodon e innde gorko oon. De ndaaree ko ngadudon! On cankitii waaju moodon oon ley Urusaliima fuu. Katin du, odon njidi yowude dow amin wareede gorko oon.

²⁹ Piyeer e nulaabe been njaabii, mbi'i:

—Ina tilsi neddo downtanoo Laamdo, wanaa yimbe. ³⁰ Laamdo maamiraabe meeden iirtinii Iissa mo tontudon e leggal de mbardon dum oon. ³¹ Wo kanko Laamdo teddini faa toowni, de joyyini mo gere nyaamo muudum. Laamdo wadi mo hooreejo, wadi mo kisinoowo faa o hokka Israa'iilankooбе no tuubira, faa keba yaafaneede lutti mubben. ³² Minen ngoni seedeebe kabaaruji diin. Ruuhu Ceniido mo Laamdo hokki downtaniibe dum du na seedii dum.

³³ Nde waalde Saahiibe been nannoo dum ndeen, tikki sanne, anniyii warude 6e. ³⁴ Ammaa ina woodi toon gorko jeyaado e waalde Farisa'en bi'eteedo Gamaliyel, jannginoowo Tawreeta Muusaa, teddudo e yimbe fuu. Gorko oon ummii, darii hakkunde waalde Saahiibe ndeen, yamiri nulaabe been njaltinee seeda. ³⁵ Caggal dum, o wi'i 6e:

—Israa'iilankooбе, ndeenee ko'e mon e yimbe 6e, e ko anniyidon wadude dum. ³⁶ Booyaay ko Tewdas 6angunoo. Imo jogorinoo hoore makko won ko o laatii. Ko wadata yimbe keme nayo ina njokkunoo mo. O warama, jokkunoobe mo been fuu cankitake, de dum fuu laatake 6olum.

³⁷ Caggal makko, Yahuuda Galilinkeejo oon warino wakkati limgal. Yimbe heewbe njokki dum.

Kam du halkaa, jokkube dum been fuu cankitii.

³⁸ Joonin, mido haalana on: accee yimbe been, celon be. Sabo si anniyaaji mabbe e golle mabbe to yimbe yuuri fu, dum fiirtoto. ³⁹ Ammaa si tawii to Laamdo dum yuuri du, on mbaawaa sakkaade dum. Kaybee, taa on kabu e Laamdo!

⁴⁰ Waalde Saahiibe ndeen jaabi dabare makko. Be nodditi nulaabe been, be piyi dum'en, be cappani dum'en taa kaala e dow innde Iisaa katin, be njoofi dum'en. ⁴¹ Nulaabe been ndilli yeeso waalde Saahiibe ndeen. Be ceyii sabo Laamdo ndaardii be ibe poti huyfineede saabe innde Iisaa. ⁴² Nyannde fuu be njoppaay waajaade e jannginde Kabaaru Lobbo haala Iisaa Almasiihu kaan ley suudu dewal mawndu e ley galleeji.

6

No worbe njeddo cuboraa faa mballa nulaabe

¹ E balde deen, tawi taalibaabe been ina bseydoo heewude. Alhuudiyankoobe haaloobe geresankoore mbuykani Alhuudiyankoobe haaloobe ibraninkoore, mbi'i kam'en kaa, rewbe muubben be goriraabe muubben maayi been njedataake ko njeyi hebude e neema nyannde fuu. ² Nulaabe sappo e dido been noddi jamaa goondinbe oon fuu, mbi'i:

—Min kaanaa yoppude konngol Laamdo faa min peccana yimbe nyaamdu. ³ Sakiraabe, cubee hakkunde moodon worbe njeddo anndiraabe ko woodi, heewbe Ruuhu Ceniido e hakkillo, faa min

kalfina dum'en gollal ngaal. ⁴ Minen kaa, accon min tinnoo e du'aare e waajaade konngol Laamdo.

⁵ Haala kaan weli goondinbe been fuu. Ndeen 6e cubii Etiyen, gorko keewdo goondinal e Ruuhu Ceniido, kam e Filipu e Porokor e Nikanor e Timon e Parmena e Nikolas, jeyaado Antiyoki naatudo e diina Alhuudiyankoobe oon. ⁶ Be ngaddi subaabé been yeeso nulaabe. Been njowi juude muubben e dow mabbe, ndu'anii 6e.

⁷ Konngol Laamdo ina yaaja yaade. Taalibaabe ina 6eydoo heewude sanne e ley Urusaliima. Al-maami'en heewbe ngoondini Iisaa.

No Etiyen nanngiraa

⁸ Etiyen, kebbinaado moyyere e baawde Laamdo oon, ina wada kaayeefiji e maandeeji kaayniidi mawdi hakkunde yimbe. ⁹ Ammaa yimbe wobbe ngari ndukidi e Etiyen. Been ngoni jeyaabe e waajordu wi'eteendu waajordu rimdinaabe. Ley mabbe ina woodi yuurube Sireene e Alesandiri e Silisi e Aasiya. ¹⁰ Ammaa 6e kunngii jaalaade mo sabo imo haalda e mabbe hakkilantaaku e Ruuhu. ¹¹ Ndeen 6e nyoyyi yimbe mbi'a nanii imo mbonkoo Muusaa e Laamdo. ¹² Nii 6e umminiri hakkillooji jamaa oon e mawbe been e jannginoobe Tawreeta been. Be ngari, 6e nanngi Etiyen, 6e njaari dum to waalde Saahiibe toon. ¹³ Be ngaddi seedeewe fewreebe, ina mbi'a:

—Gorko o selataa wi'ude ko boni dow wuro seniingo ngo e Tawreeta Muusaa. ¹⁴ Min nanii imo wi'a Iisaa Nasaraatujo oon liban suudu ndu, de waylita al'aadaaji di Muusaa yoppidi en ciin.

15 Saahiiþe joodiþe doon 6een fuu ndaari Etiyen faa woodi, nji'i yeeso makko ina wa'i hono yeeso maleyka ni.

7

Waaju Etiyen

1 Ndeen Almaami Mawdo oon yami Etiyen:

—Yalla ko 6e mbi'i duum, wo noon worri naa?

2 Etiyen jaabii, wi'i:

—Sakiraabe e baabiraabe, kettindanee kam! Laamdo jom teddeengal oon 6anganii maami en Ibrahiima nde wonnoo leydi Mesopotami, fadde muufum hodoyde Haran, **3** wi'i dum: «Eggu e leydi maa e lenyol maa, njahaa e leydi ndi kollanmaami ndiin.»* **4** Ndeen Ibrahiima dilli leydi Kaldiya, yehi hodowi Haran. Caggal maayde bammum, Laamdo eggini dum doon, waddi dum e leydi ndi kodusdon e muufum joonin ndi. **5** Laamdo hokkaay mo e leydi ndi tafon, fay taabannde. Ammaa aadake hokkude mo ndi, ndi laatoo halal makko, kanko e yuwdi makko, fay si taweede o walaa 6iddo tafon. **6** Inan ko Laamdo wi'i: «yuwdi maa feran joodowoo leydi njananndi, maree, torree duubi keme nay. **7** Ammaa leydi marundi 6e ndiin, mi jukkoto ndi. Caggal duum, 6e njaltan leydi ndiin, 6e teddina kam e nokku oodo.»† Wo noon Laamdo wi'i. **8** Ndeen Laamdo ha66idi e Ibrahiima amaana. Taadagol laatii maande amaana oon. Hono noon, ko Ibrahiima hefi Isiyaaka duum, taadi dum nde wadunoo balde jeetati. Hono noon Isiyaaka taadiri Yaakuuba. Hono noon Yaakuuba

* **7:3** Fuddoode 12.1. † **7:7** Fuddoode 15.13-14.

du wadiri bibe muudum sappo e dido, laatiibe maamiraabe lenyi meeden sappo e didi.

⁹ Maamiraabe been kaasidii Yuusufi, conni dum Misira. Ammaa Laamdo ina wondi e makko, ¹⁰ hisini mo e torraaji di o torraa fuu, hokki mo moyyere e hakkilantaaku yeeso Fira'awna kaananke Misira oon. Oon wadi mo dawranoowo galle muudum e Misira fuu. ¹¹ Ndeen rafo wadi ley Misira e Kanaana fuu. Billaare mawni faa maamiraabe meeden kunngii nyaamdu. ¹² Nde Yaakuuba nannoo nyaamri ina woni ley Misira ndeen, neli toon maamiraabe meeden. Be njehi, be ngarti. ¹³ Nde be njeccinoo Misira didaberde fu, Yuusufi anndintinii sakiraabe muudum been hoore mum. Suudu baaba Yuusufi du bangani Fira'awna. ¹⁴ Ndeen Yuusufi neli noddanee bam-mum Yaakuuba e koreeji muudum fuu. Wo be yimbe capande njeddo e njoyo. ¹⁵ Yaakuuba nootowii Yuusufi Misira. O maa yi toon, kanko e maamiraabe meeden been. ¹⁶ Be njaaraa Sikem, be uwaa e saabeere nde Ibrahiima soorunoo e bibe Hamor buudi cardi to Sikem toon.

¹⁷ Nde amaana mo Laamdo wadannoo Ibrahiima badinoo yottaade ndeen, Ibraninkoobe keewi ley Misira. ¹⁸ Wakkati oon, kaananke goddo mo anndaano Yuusufi laamii Misira. ¹⁹ Kaananke oon hiili lenyol meeden, torri maamiraabe meeden faa tilsinani be be njoppa cukaloy mabbe faa maaya. ²⁰ Ley wakkati oon, Muusaa rima, wo korsudo Laamdo. O muyninaa lebbi tati ley galle baabiiko. ²¹ Nde o yoppanoo ndeen, bii Fira'awna debbo hooyi mo, jogorii mo biyum. ²² Hono noon Muusaa janngiri anndal Misirankoobe fuu, o laatii barki-naado e haalaaji e golle fuu.

²³ Nde Muusaa hebunoo duubi capande nay ndeen, muuyi wallude sakiraabe muudum bïbïe Israa'iila. ²⁴ O yi'i Misiranke ina toonyoo gooto mabbe. O yomnitanii neddo makko oon ko toonyaa duum, o fiyi Misiranke oon, o wari dum. ²⁵ Imo sikka sakiraabe makko been paaman Laamdo ina hisinira ñum'en e makko, de ñe pamaay. ²⁶ Jaango majjum o tawdi dido mabbe ina kabä. O tefi rewrightinde ñe, o wi'i: «Yigiraabe am, onon, on sakiraabe! Dume wadi de odon kabä?» ²⁷ Ndeen toonyiido gondo muudum oon dunyi mo, wi'i: «Moy wadi ma hooreejo naa carotoodo amin? ²⁸ Dum le a jidudo warude kam no mbardunodaa Misiranke oon keenjan naa?»† ²⁹ Muusaa doggi saabe konngol ngool, de laatowii janano ley leydi Madiyan. O hebï toon bïbïe worbe dido.

³⁰ Nde o hibbinnoo toon duubi capande nay ndeen, maleyka ñangi e makko e ley demle yiite e wuumoore hubboore, ley ladde dakkol waamnde wi'eteende Sinayi. ³¹ Nde Muusaa yi'unoo ñum ndeen, ñum haaynii ñum. Imo battitoo faa o ndaara, de daande Joomiraado wi'i: ³² «Miin woni Laamdo maamiraabe maada, Ibrahiima e Isiyaaka e Yaakuuba.» De Muusaa na diwna, suusaa ndaarude toon katin. ³³ Joomiraado wi'i mo: «Borta pade maa, sabo nokkuure do ndaridaa doon wo seniinde. ³⁴ Mi yi'ii torra kewtiido yimbe am been to Misira, mi nanii uumaali mabbe. Mi jippake faa mi billita ñe. Joonin le, war, mi nule Misira.»§

³⁵ Muusaa mo ñe calanii de ñe mbi'i: «Moy wadi

† **7:28** Wurtagol 2.11-14. § **7:34** Wurtagol 3.1-10.

ma hooreejo naa carotoodo?», wo oon Laamdo nuli. Laamdo wadi dum hooreejo e kisinoowo, wadi dum e junngo maleyka bangannoodo dum e ley wuumoore oon. ³⁶ Kanko wurtini 6e, o wadi kaayefiji e maandeeji kaayniidi ley leydi Misira e ley maayo Maaliya e ley ladde duubi capande nay. ³⁷ Oon woni Muusaa biido 6ibbe Israa'iila: «Laamdo nuldan on annabaajo hono am, sakiike moodon.» ³⁸ Nde 6e kawritinnoo ley ladde ndeen, wo kanko wondi e maleyka kaaldunoodo e makko to waamnde wi'eteende Sinayi. Kanko laatii jottinoowo dum fuu to maamiraabé meeden. Wo kanko hebi haalaaji buurnooji faa o hokka en.

³⁹ Ammaa maamiraabé meeden njabaay dōwtanaade mo. Be calanii mo, hakkillooji mabbe pornyii Misira. ⁴⁰ Be mbi'i Haaruuna: «Wadan en tooruujji ardotoodi en, sabo en anndaa ko hewtii Muusaa jaltinnoodo en leydi Misira oon.»* ⁴¹ Ley balde deen, 6e tafi tooru nanndundu hono ga'el. Be ngadani ndu kirsamaari, i6e ngada weltaare saabe golle juude mabbe. ⁴² Ndeen Laamdo tottitii 6e, yoppiri 6e rewude koode kammu, hono no winndiraa e dewtere annabaabé:
«Hey lenyol Israa'iila!

Duubi capande nay dí ngadudon ley ladde diin,
on ngadanii kam sadakaaji e kirsamaaji naa?
⁴³ On ngadaay. On ndonndake hukum do tooru moodon Molok resaa,
kam e tooru ndu ngadudon hoodere mon wi'eteende Refan,
nate de moyyindon faa cujidanon dum'en!
Dum wadi de mido eggina on,

* **7:40** Wurtagol 32.1.

faa njaaredon caggal Baabiila.»†

44 Etiyen 6eydi katin:

—Maamiraabe meeden been ina njoginoo hukum seedaaku ley ladde. Hukum oon moyyiniraama hono no Laamdo tindiniri Muusaa, e sifa mo o holli dūm. **45** Maamiraabe meeden ndoni hukum oon. Be eggidi e makko wakkati mo Yoosuwa ardinoo 6e. Be nanni dūm leydi ndi 6e teeti e lenyi dī Laamdo riiwi diin. Dum worri noon faa jamaanu Daawda. **46** Daawda hebi moyyere Laamdo, o nyaagii dūm faa yardoo o nyibana Laamdo Yaakuuba joonnde. **47** De wo Suleymaana, kam nyibi suudu nduun. **48** Ammaa Laamdo Toowdo oon joodataako e cuudi dī yimbe nyibi, hono no annabaajo wi'iri:

49 «Joomiraado wi'i:

Kammu wo joodorgal am,
leydi woni to koyde am njaabata.

Suudu nduye nyibanton kam?

E nokku oye powtintoomi?

50 Wanaa miin tagiri kulle deen fuu baawde am naa?»‡

51 Etiyen 6eydi katin, wi'i:

—Onon sattubē, yoorbe berde, faadinkiniibē! Abada on celaay salanaade Ruuhu Ceniido! On laatake hono maamiraabe moodon been ni. **52** Moy woni annabaajo mo maamiraabe moodon torraay? Be mbarii haalannoobē haala garol Ponnditiido. Joonin onon e ko'e moodon du, on njambake Ponnditiido oon, on mbarii dūm. **53** On kebii

† **7:43** Amos 5.25-27. ‡ **7:50** Esaaya 66.1-2.

Tawreeta Muusaa mo maleyka'en njippini de on njokkaay dum.

No Etiyen wardaa e kaaye

⁵⁴ Nde Saahiiþe been nannoo haalaaji diin fu, þe tikkani mo sanne sanne faa iþe nyeryundura nyiiye mabþe. ⁵⁵ Ammaa kanko kebbinaado Ruuhu Ceniido oon, o tiggiti kammu, o yi'i manngu Laamdo, o yi'i Iisaa ina darii gere nyaamo Laamdo. ⁵⁶ O wi'i:

—Ndaaree! Mido yi'a kammu ina udditii, Bii Neddo ina darii gere nyaamo Laamdo!

⁵⁷ Be mbulli semmbe, þe cukki noppi mabþe, þe fuu þe ngurbitanii mo. ⁵⁸ Be mburtini mo ngalluure ndeen, þe limni mo kaaye. Seedeewe been bortii saayaaji muþben dowuuji, mballini dakkol koyde jokolle bi'eteedo Sool. ⁵⁹ Wakkati mo þe limnata Etiyen kaaye oon, du'ii, wi'i:

—Iisaa Joomiraado, inan yonki am, jaþu ki!

⁶⁰ Ndeen, o hofii, o feekii faa toowi, o wi'i:

—Joomiraado, taa rewta þe e hakke o!

Nde o haalnoo dum ndeen, o maayi.

8

¹ Sool ina yardii ko þe mbari Etiyen duum.

Nyalooma oon, torra mawdo hewtii kawrital goondinþe wonþe Urusaliima toon. Be fuu þe cankitii ley leyde Yahuudiya e Samariya, si wanaa nulaabe been. ² Worþe hulþe Laamdo uwi Etiyen, mboyi dum bojji keewdi. ³ Sool kaa yehi na halka kawrital goondinþe ngaal. Imo naata cuudi, imo nannga worþe e rewþe, imo daasa dum'en, imo uddowa dum'en ley kasu. ⁴ Ammaa sankitiiþe been naati e yiilaade ina mbaajoo Kabaaru Lobbo.

No Filipu waajorii Kabaaru Lobbo ley leydi Samariya

⁵ Filipu du yehi ngalluure wonnde ley leydi Samariya, ina waajoo yimbe kabaaru Almasiihu.

⁶ Yimbe toon heewbe nani kabaaru maandeeji kaayniidi di Filipu wadi, woodi njii'dum du. Ndelle be kettindii waaju makko faa woodi. ⁷ Wondube e ginnaaji heewbe, ginnaaji diin njaltiri bullaali mawdi. Heewbe be galli muusen mbaati ndadi, kam'en e bonnguuube. ⁸ Dum laatanii ngalluure ndeen seyo manngo.

⁹ Gorko bi'eteedo Simon ina wonnoo ley ngalluure ndeen. Imo gollannoo ndaggadaaku, imo haayninoo Samariyankoobe sanne, imo wiitoo wo o neddo mawdo. ¹⁰ Yimbe been fuu ina njabani mo, gilla suka faa mawdo. Be mbi'i:

—Gorko o jogii baawde Laamdo bi'eteede «Baawde mawde».

¹¹ Be njokkii mo ko 600yi sabo imo haayninoo be e dabare makko. ¹² Ammaa nde Filipu waajinoor be Kabaaru Lobbo haala laamu Laamdo e haala Iisaa Almasiihu ndeen, be ngoondini. Worbe e rewbe du lootaa lootagal batisima*. ¹³ Simon e hoore muudum goondini, kam du. Nde o batissa ndeen, o takkunduri e Filipu. O yi'i maandeeji kaayniidi e kaayefiji mawdi gadaadi diin, de dum haaynii mo.

¹⁴ Nulaabe wonbe Urusalima been nani Samariyankoobe ngoondinii konngol Laamdo. Be nuldi dum'en Piyeer e Yuhanna. ¹⁵ Nde been njottinoo ndeen, ndu'anii be faa be keba Ruuhu

* **8:12** Do wi'ete lootagal batisima dow haala batisima, lootagal tuubu maa mutineede du na wi'ee.

Ceniido, ¹⁶ sabo Ruuhu Ceniido jippaaki e dow fay gooto maßbe tafon. Wo dow innde Iissa Joomiraado oon tan 6e mbatisiraa. ¹⁷ Ndeen Piyeer e Yuhanna njowi juude mußben dow maßbe de 6e kebi Ruuhu Ceniido.

¹⁸ Nde Simon yi'unoo Piyeer e Yuhanna ina njowi juude mußben dow maßbe ina kokka 6e Ruuhu Ceniido ndeen, inndani 6e ceede, ¹⁹ wi'i:

—Kokkee kam miin du baawde de faa mo njowumi juude am e dow muudum fuu heba Ruuhu Ceniido.

²⁰ Ndeen Piyeer jaabii mo, wi'i:

—Wo Laamdo halke, aan e cardi maa, sabo a miili dokkal Laamdo na hebiree ceede! ²¹ A walaa ngedu ley golle amin, dum walanaa ma, sabo bernde maa fonnditaaki to Laamdo. ²² Tuubu, wurta e bonanda maa oon, nyaagodaa Joomiraado yalla imo yaafe e anniya maa bondo oon. ²³ Sabo mi yi'ii ma a kaadudo bernde, hakke maa habbii ma.

²⁴ Simon jaabii, wi'i:

—Nyaaganee kam Joomiraado taa fay huunde e ko mbiidion duum hewtoo kam.

²⁵ Woodi, Piyeer e Yuhanna ceedanii Almasiihu, mbaajii konngol Joomiraado toon. Caggal duum, 6e njeccii Urusaliima. Dow laawol ngool du, i6e mbaajoo Kabaaru Lobbo oon e gure Samariya keewde.

No Filipu batisiri howruijo kaananke Etiyopi

²⁶ Maleyka Joomiraado wi'i Filipu:

—Umma, yaaru hordoore, kooyaa laawol jeewniingol yuuroowol Urusaliima ina fonndii Gaaja ngool.

²⁷ O ummii, o yehi. O hawri e gorko Etiyopiyanke. Gorko oon wo howruujo Kandasa. Maanaa Kandasa wo «laamiido debbo Etiyopi». Wo o coortaado, kayboowo beembal jawdi kaananke debbo oon. Tawi o yehiino Urusaliima sujidande Laamdo. ²⁸ Ko o wartata duum, imo joodii e dow torkooru makko puccu, imo jannga ley dewtere annabi Esaaya. ²⁹ Ruuhu wi'i Filipu:

—Batta, samnda torkooru nduu.

³⁰ Filipu doggi hewti ndu, nani imo jannga dewtere annabi Esaaya, de wi'i mo:

—Ndelle ada faama ko njanngataa duum naa?

³¹ Gorko oon jaabii, wi'i:

—Noy paamirammi si fay gooto fiirtanaay kam?

O nyaagii Filipu yeenja joododoo e makko.

³² Inan aayaaje de o janngi ley dewtere ndeen:

«O yaaraama hono mbaalu kirsoyteengu ni.

No baalel deyyinortoo yeeso kesoowo leebi muudum ni,

hono noon o muubbiri hunnduko makko.

³³ Be leeyinii mo, be carii mo sariya bondo.

Moy waawi fillaade filla yuwdi makko?

Sabo be ittii yonki makko ley adunaaru ga.»†

³⁴ Howruujo oon wi'i Filipu:

—Mido ñaare, haalanam dow moy annabaajo oon haalata haala ka. Wo dow hoore muudum naa wo goddo?

³⁵ Ndeen Filipu fuddi haalude dow aayaaje deen, de waajii mo Kabaaru Lobbo haala Iisaa. ³⁶ Ibe njokki laawol maabbe ngool faa be nji'i ndiyam. Howruujo oon wi'i:

† **8:33** Esaaya 53.7-8.

—Inan ndiyam! Dume hadata kam looteede lootagal batisima? ³⁷ [Filipu wi'i:

—Si tawii ada goondini e 6ernde laabunde fu, walaa ko hadete batiseede. O jaabii, o wi'i:

—Mido goondini Iisaa Almasiihu woni Bii Laamdo.][†]

³⁸ O yamiri torkooru nduun daroo. Be diido fuu 6e njippii, 6e naati ndiyam daam. Filipu looti mo lootagal batisima. ³⁹ Nde 6e mburtinoo ndiyam dam ndeen, Ruuhu Joomiraado hooyi Filipu. Howruujo oon yiitaay mo katin, jokki laawol muudum, ina seyii. ⁴⁰ Filipu tawowaa Ajootus. § Gilla doon faa Kaysariya, wuro fuu ngo o war e muudum, o waajoto Kabaaru Lobbo.

9

No Sool tuubiri

¹ Sool ina heddii na haala haalaaji kul6iniidi dow taalibaabe Joomiraado been, na wi'a o waran dum'en. O yehi to Almaami Mawdo. ² O 7aarii dum derewol yamiroore nannoore mo cuudi Al-huudiyankoo6e baajordi gondi Damas. Hono nii, si o tawii toon yimbe jokku6e laawol Iisaa, gorko e debbo fuu, o nannga dum'en, o habba, o yaara Urusaliima. ³ Nde o yahunoo faa o battitii Damas ndeen, wakkati gooto annoora yuuri dow kammu fiili mo. ⁴ O saami e leydi, o nani daande ina wi'a mo:

—Sool, Sool, ko wadi de ada torra kam?

⁵ Sool yami:

† **8:37** E dereeji 6ooydi, goddi ngalaa aaya 37. § **8:40** E amaana kiidso wuro Ajootuswi'etaakenaa Asdot.

—Aan wo a moy, joomam?

Nde o yamunoo düm fu, jaabu wari e makko:

—Miin, wo mi Iisaa mo torrataa oon. ⁶ Umma naatu e ley ngalluure ndeen. Be kaalante ko tilsingadää.

⁷ Worbe wondube e makko been nani daande ndeen ammaa njii'aay fay gooto. Be ndarii, be mbe-mmbaa faa be muumdi. ⁸ Sool ummii e leydi, ina feerti gite muudum ammaa yi'ataa fay huunde. Ndeen o dowaa, o nannaa Damas. ⁹ O wadi balde tati o bumdo. O nyaamaay, o yaraay.

¹⁰ Ley Damas doon ina woodi taalibaajo bi'eteedo Ananiyas. E ley holleede, Joomiraado noddi düm, wi'i:

—Ananiyas!

O jaabii, o wi'i:

—Naam, Joomiraado.

¹¹ Joomiraado wi'i mo:

—Umma rewu laawol bi'eteengol Dartiingol, naataa galle Yahuuda, pilodaa gorko bi'eteedo Sool, jeyaado Tarsus, sabo joonin imo wada du'aare. ¹² O yi'i e ley holleede gorko bi'eteedo Ananiyas ina naata, ina yowa juude muudum e makko faa o wumta.

¹³ Ananiyas jaabii, wi'i:

—Joomiraado, mi narrii yimbe heewbe haala gorko o e torraaji keewdi di o wadi seniibe maa wonbe Urusaliima. ¹⁴ O wardii do e yamiroore hooreebe almaami'en, faa o haabba noddoobe inde maa fuu.

¹⁵ Ammaa Joomiraado wi'i mo:

—Yahu wadoy no mbiimi ni, sabo mi subake gorko o faa o gollana kam. O anndina lenyi e

kaanankooße e 6i66e Israa'iila du innde am. ¹⁶ Mi hollan mo na tilsi o torree torraaji keewdi saabe am.

¹⁷ Ndeen, Ananiyas yehi, naatowi suudu nduun, yowi juude muudum e makko, wi'i:

—Sakiike am Sool, Joomiraado meeden Iisaa 6angannoodo ma e laawol nde ngarannodaa oon, nulii kam faa mbumtaa, keewaa Ruuhu Ceniido.

¹⁸ Wakkati oon fu, huunde wa'unde hono kobolaaje nii hobbitii e gite Sool. O wumti, o ummii, de o lootaa lootagal batistema. ¹⁹ O nyaami, de semmbe makko warti. O hedodii e taalibaabé wonbē Damas been balde seeda.

No Sool waajorii kabaaru Iisaa ley Damas

²⁰ Wakkati oon fu, Sool fuddi waajaade ley cuudi baajordi. Imo wi'a Iisaa jaati woni Bii Laamdo.

²¹ Dum haaynii hettindaniibē mo been fuu, mbi'i:

—Wanaa kanko wonnoo torrannoodo goondinbē Iisaa wonbē ley Urusaliima oon naa? Wanaa faa o habba goondinbē o yaara dūm'en to hooreebē almaami'en waddi mo do naa?

²² De Sool ina heddi na beydoroo semmbe e ley waaju muudum oon, faa dūm jii6i Alhuudiyankooße wonbē Damas been fuu. O laabinani bē Iisaa woni Almasiihu oon.

²³ Balde njehi, ngarti, Alhuudiyankooße ndawridi faa mbara Sool. ²⁴ Sool humpitii dabare ma66e ndeen. Yimbe ina kayba dammbude ngalluure ndeen jemma e nyalooma fuu, faa bē keba no bē mbarda mo. ²⁵ Jemma gooto taalibaabé makko kooyi mo, ngatti mo e hanndeere, kabbi boggol, njaltiniri mo kokuwol pililingol ngalluure ngool.

*No taalibaabe wonbe Urusaliima kebiri
hoolaade Sool*

²⁶ Nde Sool warnoo Urusaliima ndeen, muuyi hawritinde e taalibaabe Iisaa been. Ammaa 6e fuu i6e kula mo, 6e koolaaki yalla o laatake taalibbo Iisaa goonga goonga. ²⁷ Ndeen Barnabas yaari mo to nulaabe been, haalani dum'en no o yiiri Joomiraado ina haalda e makko e laawol ngool, e no o waajorii haala Iisaa e cuusal ley Damas toon. ²⁸ Caggal duum, Sool wondi e ma6be, ina naata ina wurtoo ley galleeji ma6be Urusaliima, ina waajoroo haala Joomiraado e cuusal. ²⁹ Imo haalda e Alhuudiyankoobe haalannoobe geresankooore been, imo yeddundura e ma6be, de kambe kaa i6e piloo warude mo. ³⁰ Nde sakiraabe makko goondin6e been annditinnoo dum ndeen, njaari Sool Kaysariya. Caggal duum, 6e neli mo Tarsus.

³¹ Ndeen kawrital goondin6e ngaal hebi jam ley Yahuudiya e Galili, kam e Samariya fuu. Ngal 6eydi semmbe, ngal yehi yeeso e kulol Joomiraado, ngal 6eydii heewude saabe ballal Ruuhu Ceniido.

No Piyeer danniri yimbe ley Lidda e Joffe

³² Piyeer ina yiiloo e ley leydi ndiin fuu. O jippanii seniibe wonbe Lidda been du. ³³ O tawi toon gorko nyawdo mo 6anndu muudum fuu waati, bi'eteedo Eneya. O wadii duubi jeetati imo waalii.

³⁴ Piyeer wi'i mo:

—Eneya, Iisaa Almasiihu dannii ma! Umma, moyyin daddo maa!

Wakkati oon pay, o ummii. ³⁵ Wonbe Lidda e ngenndi Saron fuu njii'mo, de tuubani Joomiraado.

³⁶ Ley wuro Joffe ina woodi taalibaajo debbo bi'eteedo Tabita (maanaa majjum woni «Lewla»). Dum woni Dorkas e geresankoore. Imo golla golleeji lobbi, imo wadana talkaabé moyyere. ³⁷ E balde deen o nyawi, o maayi. O lootaa, de o wal-linaa ley suudu sooro tafon. ³⁸ Wuro Joffe ngoon woddsunduraa e Lidda, woodi du, taalibaabe been nani Piyeer ina woni to Lidda toon. Ndelle 6e neli worbe dido njaaro mo o yottoo dum'en law. ³⁹ Piyeer ummii, yaadi e mabbe. Nde 6e njottinoo ndeen, 6e njaari mo ley suudu sooro toon. Rewbe talka'en 6e goriraabe mu6ben maayi been fuu battii dum ina mboya, ina kolla dum saayaaji e kaddule godde de Dorkas nyo'unoo nde wonderdunoo e mu6ben ndeen. ⁴⁰ Piyeer wurtini yimbe been fuu, hofii, ina du'oo. Caggal duum, hucciti e maaydo oon, wi'i:

—Tabita, umma!

Ndeen Tabita feerti gite muudum, yi'i Piyeer, ummii joodii. ⁴¹ Piyeer nanngi junngo makko, ummini mo. Caggal duum, o noddi seniibe been e rewbe talkaabé been, o holli dum'en Tabita wo buurdo. ⁴² Dum nanaama e ley Joffe fuu, heewbe ngoondini Joomiraado. ⁴³ Piyeer booyti Joffe balde keewde to ceeloowo guri bi'eteedo Simon.

10

No Piyeer noddiraa to suudu Korneliyus

¹ Ley Kaysariya ina woodi gorko bi'eteedo Korneliyus. O mawdo fedde sordaasi'en wi'eteende «fedde Italiyankoobe». ² O tinniido e diina, kanko e koreeji makko fuu 6e hulbe Laamdo. Imo

sakkana Alhuudiyankoobe sadakaaji keewdi, imo wada du'aare to Laamdo wakkati fuu. ³ Nyannde gomma wakkati yamnde tati, o yi'i e ley holleede maleyka ina naata suudu makko. Maleyka oon ina wi'a mo:

—Korneliyus!

⁴ O ndaari dum faa woodi, o huli, o wi'i dum:

—Joomam, dum?

Maleyka oon wi'i mo:

—Du'aawuuji maa e sadakaaji di ngadandaa talkaaße diin ina mbeli Laamdo. Laamdo yeg-gitaay ma. ⁵ Nulu joonin worbe to wuro Joffe, faa noddowa Simon, bi'eteedo Piyeer. ⁶ Imo jippии to ceeloowo guri bi'eteedo Simon, mo suudu muudum hetti e maayo manngo.

⁷ Nde maleyka kaaldannoodo e makko oon dil-lunoo ndeen, o noddi gollooбе makko ciido e sor-daasi gooto kuldo Laamdo jeyaado e howruuбе makko. ⁸ O haalani be ko maleyka oon wi'i dum fuu, o neli be Joffe.

⁹ Jaango majjum, iбе ngori e laawol. Nde worbe tato been battinoo wuro ngoon ndeen, Piyeer yeeji dow suudu do weeri doon wakkati hakkunde naange faa wada du'aare. ¹⁰ O yolbii sanne, imo yidi nyaamude. Nde be moyyinanta o nyaamdu ndeen, Laamdo holli mo. ¹¹ O yi'i kammu udditii, de huunde wa'unde hono disaare mawnde ina jippinee e leydi. Cobbuli muudum nay fuu ina kabbaa. ¹² Sii daabaaji fuu di koyde nay, e kulle ladowje, kam e sii pooli fuu ina ngori e mayre.

¹³ Daande wi'i mo:

—Piyeer, umma, hirsu, nyaam!

¹⁴ Piyeer wi'i:

—A'aa, abada Joomiraado! Abada mi nyaamaay ko harmi naa ko tuuni.

¹⁵ Daande ndeen wi'i mo katin:

—Taa harmin ko Laamdo laabini.

¹⁶ Dum wadi noon kile tati. Ndeen disaare ndeen yeentinaa dow kammu.

¹⁷ Piyeer ina wemmbii dow ko hollaas duum, ko dum fiirtata. Tawi worbe be Korneliyus nelunoo been, yamiino galle Simon, de joonin be ngari. Be ndarii e dambugal. ¹⁸ Be noddi, be yami yalla Simon bi'eteedo Piyeer doon jippii. ¹⁹ Piyeer ina heddi na miiloo dow ko yi'i duum, faa Ruuhu wi'i dum:

—Worbe tato ina pile. ²⁰ Umma, jippa, njaadaa e maabbe tawa a sikkituraay, sabo miin nuli be.

²¹ Piyeer jippii, wi'i worbe been:

—Inani kam, miin woni mo pilotodon oon. Dume waddi on?

²² Be njaabii, be mbi'i:

—Korneliyus mawdo sordaasi'en neli min. O gorko dartiido, kuldo Laamdo, mo lenyol Alhudiyan kooobe fuu seedanii moyyere. Maleyka ceniido yamirii mo min nodde, ngaraa suudu makko, faa o nana waaju maada.

²³ Piyeer silmini be, weerni be jemma oon.

Jaango majjum, o ummii, o dillidi e maabbe. Sakiraabe wobbe jeyaaabe Joffe njaadi e makko.

²⁴ Jaango majjum katin be njottii ngalluure Kaysariya. Korneliyus ina hedino be, noddi sakiraabe muudum e yigiraabe muudum badiibe.

²⁵ Nde Piyeer naatannoo ndeen, Korneliyus jaabii dum, sujidani dum. ²⁶ De Piyeer ummini mo, wi'i:

—Umma, sabo miin du mi neddo tan.

²⁷ Piyeer ina haalda e makko, faa ɓe naati suudu nduun, tawi toon yimɓe heewɓe ina kawriti. ²⁸ O wi'i ɓe:

—Odon anndi daganaaki Alhuudiyanke jokkundra e mo wanaa Alhuudiyanke, naa weerande dum. Ammaa Laamdo hollii kam taa mi ndaarda fay gooto karmudo naa tuundo. ²⁹ Dum wadi nde nelandon kam ndeen, mi warii, mi salaaki. Dum le, kaalanee kam, saabe dume noddirson kam?

³⁰ Korneliyus jaabii, wi'i:

—Hannden woni balde nay, mido waşa du'aare ley suudu am e wakkati hono o, yamnde tati ni, faa gorko mo kaddule jalbooje wari, darii yeeso am, ³¹ wi'i: «Korneliyus, Laamdo jaabanake ma du'aawuuji maa e sadakaaji maa. ³² Joonin, nulu e wuro wi'eteengo Joffe, noddaneda Simon, bi'eteedo Piyeer. Imo jippii to ceeloowo guri bi'eteedo Simon, mo suudu muudum hetti e maayo manngo.» ³³ Dum wadi de nelumi nod-dowedaa wakkati oon. A gaynii ko ngardaa duum. Joonin min fuu inani min yeeso Laamdo faa min kettindoo ko Joomiraado yamiri ma mbaajodaa min fuu.

³⁴ Ndeen Piyeer fuddi haalude, wi'i:

—Joonin mi yi'ii goonga jaati Laamdo burdintaa yimɓe. ³⁵ Neddo kuloowo mo, gadoowo ko fonnditii, o jaaban dum ko lenyol muudum laatii fuu. ³⁶ Odon anndi konngol ngol Laamdo nuldi ɓiɓe Israa'iila ngool. Konngol lobbol ngool na Holla jam na hebiree saabe Iisaa Almasiihu, kam woni Joomiraado yimɓe fuu. ³⁷ Odon anndi kabaaru o huubii leydi Yahuudiya fuu. Dum fuddii gilla Galili, caggal ko Yaaya waajii yimɓe loote batistema.

38 Odon anndi no Laamdo suborii Iisaa Nasaraatu-
jo oon, no jippiniri e muudum Ruuhu Ceniido e
baawde. Odon anndi no Iisaa yiilori e nokkuje
fuu ina golla golleeji lobbi, ina danna 6e Ibili-
isa jaalii na torra fuu, sabo Laamdo ina wondi
e muudum. **39** Minen, min seedeewe ko o golli
Yahuudiya e ko o golli Urusaliima fuu. Be bili
o e leggal palaangal, 6e mbari mo. **40** Ammaa
Laamdo iirtinii mo nyannde tataberde, de bangini
mo hakkunde amin. **41** Kaa wanaa yimbe fuu
o bangani. O banganii seedeewe 6e Laamdo ar-
tii subaade been, minen nyaamduwe e makko
de njardi e makko caggal iirtagol makko been.
42 O yamirii min mbaajoo yimbe, min ceedoo
kanko woni mo Laamdo wadi carotoodo wuurge
e maaybe. **43** Kanko du woni mo annabaabe fuu
ceedanii, mbi'i goondindo mo fuu hegan yaafan-
neede hakkeiji muudum saabe innde makko.

44 Wakkati Piyeer waajotoo waaju oon ndeen,
Ruuhu Ceniido jippii e hettindiibe been fuu.
45 Alhuudiyankoobe goondinbe wardunoobe e
Piyeer been fuu dum haaynii dum'en, no dokkal
Ruuhu Ceniido ngaal saakorii e yimbe 6e nganaa
Alhuudiyankoobe ni. **46** Sabo ibe nana yimbe
been ina kaala e demle janane, na njetta Laamdo.
Ndeen, Piyeer jaabii, wi'i:

47 —Yimbe been kebii Ruuhu Ceniido hono no
meeden ni. Moy waawi hadude 6e looteede loota-
gal batisima?

48 O yamiri 6e mbatisiree e innde Iisaa Almasi-
ihu. Caggal duum, 6e nyaagii mo o wonda e maabbe
balde seeda.

11

No Piyeer jaaborii kawrital goondinbe gonngal Urusaliima

¹ Nulaabé e sakiraabé wonbé Yahuudiya 6een nani yimbe 6e nganaa Alhuudiyankoo6e du kebii konngol Laamdo. ² Nde Piyeer yeentunoo Urusaliima fu, goondinbe tilsinbe taadagol 6een peli dum, ³ mbi'i:

—A jippanake yimbe 6e taadaaki, a nyaamdii e mu6ben!

⁴ Ndeen Piyeer haalani 6e ko wadi duum gilla e fuddoode faa e timmoode, wi'i:

⁵ —Wuro Joffe ngonnoomi, mido du'oo faa njí'umi e ley holleede huunde 6anganii kam. Huunde wa'unde hono disaare mawnde nde cobbuli muudum nay fuu kabbaa, ina jippinee yuuwde e kammu warde to am. ⁶ Taykiimi nde faa woodi, njí'umi daabaaji fuu dí koyde nay, e kulle ladde e ladooje e sii pooli fuu. ⁷ Nanumi daande ina wi'a kam: «Piyeer, umma, hirsu, nyaam!» ⁸ Mbiimi: «A'aa, abada Joomiraado! Abada mi nyaamaay ko harmi naa ko tuuni.» ⁹ Daande dow kammu ndeen jaabitii kam katin, wi'i: «Taa harmin ko Laamdo laabini.» ¹⁰ Dum wadi noon kile tati. Caggal duum, kulle deen fuu yeentinaa dow kammu. ¹¹ De wakkati oon pay, worbe tato nulaabé to am yuurube Kaysariya ngari to suudu do min ngonnoo doon. ¹² Ruuhu Ceniido wi'i kam mi yaada e ma6be taa mi sikkitira fay huunde. Sakiraabé njeegomo bee do njaadi e am, de min naaddi suudu Korneliyus. ¹³ O haalani min no o yiiri maleyka ina darii ley suudu makko ina wi'a mo: «Nulu e wuro

wi'eteengo Joffe noddaneda Simon bi'eteedo Piyeer. ¹⁴ O haalante haalaaji kisinoowo ma, aan e koreeji maa fuu.» ¹⁵ Nde puddumi haalude ndeen, Ruuhu Ceniido jippii e maabbe hono no jipporinoo e meeden arande ni. ¹⁶ Ndeen, miccitiimi konngol ngol Joomiraado wi'unoo: «Yaaya batisiran-noo ndiyam, ammaa onon, on mbatisirte Ruuhu Ceniido.» ¹⁷ Si Laamdo fonndii en e maabbe, hokkii be ko hokkunoo en duum nde ngoondinnoden Joommen Iisaa Almasiihu ndeen, ndelle miin wo mi moy? Yalla mido waawi hadude Laamdo naa?

¹⁸ Nde be nannoo dum ndeen, be ndeyyinii, ibe njetta Laamdo, ibe mbi'a:

—Laamdo tuubinii yimbe be nganaa Alhuudiyankoobe du faa keba nguurndam ngoongalajam.

No Kabaaru Lobbo waajoraa ley Antiyoki

¹⁹ Nde Etiyen waranoo ndeen, goondinbe torraama faa cankitii. Woobbe njehi faa Finisi e Kipirus e Antiyoki. Ibe mbaajoo Alhuudiyankoobe tan konngol ngool. ²⁰ Ammaa goondinbe woobbe yuuroobe Kipirus e Sireene naati Antiyoki ina mbaajoo Kabaaru Lobbo haala Iisaa Joomiraado oon hakkunde Geresankoobe. ²¹ Baawde Joomiraado ina ngondi e maabbe. Yimbe heewbe ngoondini, tuubi, ngarti to Joomiraado.

²² Kawrital goondinbe wonbe Urusaliima ngaal nani kabaaru gadudo Antiyoki oon, neli toon Barnabas. ²³ Nde oon yottinoo de yi'i e maabbe moyyere Laamdo fu, seyii, tindini be fuu be tinnoo, be tabita e Joomiraado e berde laabude. ²⁴ Barnabas wo gorko lobbo, kebbinaado Ruuhu

Ceniido e goondinal. Jamaa keewdō goondini Joomiraado saabe makko.

²⁵ Caggal duum, Barnabas yehi Tarsus faa filowoo Sool. ²⁶ Nde o yiitunoo dum ndeen, o yaari dum Antiyoki. Be ngondi e kawrital goondinbe wonbe toon been hitaande hibbunde, be njanngini yimbe heewbe. Taalibaabe wonbe Antiyoki been artii fuu wi'eede Almasiyankooбе.

²⁷ E balde deen, annabaabe ley goondinbe yuurii Urusaliima ngari Antiyoki. ²⁸ Gooto mabbe bi'eteedo Agabus, ummii, darii, holliri saabe Ruuhu rafo manngo wadan ley laamu Roma fuu. (Woodi, rafo ngoon wadii e laamu kaananke mawdo bi'eteedo Kalawdiyus.)* ²⁹ Taalibaabe been anniyii hawrundurde mballa, mono fuu ko waawi, faa be nelda sakiraabe mabbe wonbe Yahuudiya been. ³⁰ Be ngadi dum, be nuldi mballa kaan e juude Barnabas e Sool faa kokkowa mawbe kawrital Urusaliima.

12

No goondinbe torriraa

¹ Wakkati oon, kaananke bi'eteedo Hirudus fuddi torrude wobbe ley kawrital goondinbe ngaal. ² O yamiri Yaakuuba sakiike Yuhanna oon wardee kaafaahi. ³ Nde o yiinoo idum weli Alhuudiyankee ndeen, o nanngi Piyeer du. Dum hawri e wakkati iidi buuru mo wattaka rabilla. ⁴ Nde o nannguno Piyeer ndeen, o ommbi

* **11:28** Kalawdiyus wo kaananke Roma mawdo njoyaabo. O laamake hakkunde duubi 41 e 54 caggal rimeede Iisaa. Taariki jamaanu oon ina holla rafo manngo wadii ley laamu Roma fuu hakkunde duubi 46 e 48 caggal rimeede Iisaa.

dum ley kasu. O yamiri pecce sordaasiibé nay loomtundura e haybugol dum, fedde fuu yimbe nayo. O anniyii yaarude dum yeeso yimbe fuu, si iidi Faltagol tilake. ⁵ Dum wadi de Piyeer haybaa e ley kasu nguun, ammaa kawrital goondinbe ngal selaay nyaaganaade mo Laamdo.

⁶ Nde Hirudus anniyinoo yaarude mo sariya ndeen, jemma oon imo daanii hakkunde sordaasiibé dido, imo haabiraa callali didi. Ndaaroobe wobbe du ina kayba dammbugal kasu doon. ⁷ Wakkati oon, maleyka Joomiraado wari to makko, annoora yayni ley suudu nduun. Maleyka meemi mo, findini mo, wi'i:

—Umma law!

Ndeen callali diin kaabbiitii, yuwi e juude makko, caami. ⁸ Maleyka oon wi'i mo:

—Haabba kaabborgol maa, borna pade maa.

Piyeer wadiri noon. Maleyka oon wi'i mo:

—Waana suddamaare maa, njokkaa kam.

⁹ Piyeer wurtii, jokki mo, de o faamaay ko maleyka oon wadata duum wo goonga. Imo miiloo wo o yi'u dum ley holleede. ¹⁰ Be paltii kayboowo arandeejo oon e didabo fuu. Be njottii dammbugal njamndi naarrugal ngallure ndeen. Ngal omtanii hoore maggal yeeso maabbe. Be njalti, be njokki laawol ngool. Wakkati oon, maleyka oon seedi e makko.

¹¹ Hakkillo Piyeer warti, wi'i:

—Joonin mi tannyorii Joomiraado nuli maleyka muudum, faa hisina kam e junngo Hirudus e ko Alhuudiyankoobe njelino faa mi wadee fuu.

¹² Nde o faamunoo ko wadi fu, o yehi suudu Mariyama, inna Yuhanna bi'eteedo Marku. Toon

yimþe heewþe kawriti ina ngada du'aare. ¹³ Nde Piyeer gokkinoo dammbugal galle toon ndeen, gollooowo debbo bi'eteedo Roda þattitii faa ndaara wo moy. ¹⁴ Nde o annditinnoo daande Piyeer ndeen, o yeggti omtude dammbugal ngaal no o foti seyaade. O doggi, o naatowi, o humpiti þe wo Piyeer darii dammbugal toon. ¹⁵ Be mbi'i mo:

—A kaanjaado!

Ammaa imo heddi siinude sikke walaa wo dum Piyeer. Be mbi'i katin:

—Dum wo maleyka makko.

¹⁶ De dum fuu Piyeer ina heddi ina gokkoo. Nde þe udditinnoo, þe njiinoo mo ndeen, dum haaynii þe sanne. ¹⁷ O huncani þe junngo faa þe ndeyyinoo, o fillanii þe no Joomiraado yaltiniri mo kasu, o wi'i:

—Kaalanee dum Yaakuuba, kam e sakiraaþe wobþe been.

Caggal duum, o yalti, o yehi nokku godðo.

¹⁸ Nde weetunoo fu, fitina mawðo ummii hakkunde sordaasiibë been. Iþe yamundura noy Piyeer wadi. ¹⁹ Hirudus yamiri þe piloo þe nannga mo, ammaa þe njiitaay mo. Ndelle o yami ndaaroþe been ko laatii, de o yamiri þe mbaree. Caggal duum, Hirudus jippii Yahuudiya, yehi Kaysariya joodowii toon.

No Hirudus maayiri maayde bonnde

²⁰ Hirudus tikkani yimþe Tirus e Sidon. De yimþe been kaa muuyaay noon, sabo wo leydi makko ndiin þe kebata nyaamdu. Ndelle þe ndawridi, þe nuli wobþe nyaagoo faa þe ndewra e makko. Be paamiri e Bilastus dawranoowo gollooþe kaananke.

²¹ Be itti nyalaande faa 6e kaalda e Hirudus kaananke oon. Nde nyannde ndeen yottinoo fu, o fornii kaddule kaananke, o joodii dow joodorgal laamu, o haaldi e mabbe. ²² Yimbe been peekii, mbi'i:

—Dum wo daande laamdo, wanaa daande neddo!

²³ Wakkati oon fu, maleyka Joomiraado fiyi Hirudus, sabo o hokkitaay Laamdo teddeengal muudum. O yumi gildi, o maayi.

²⁴ Ammaa konngol Laamdo ngool ina yaara yeeso, ina belyda sankitaade. ²⁵ Nde Barnabas e Sool tilinoo e golle mubben Urusaliima fu, be njeccodii e Yuhanna bi'eteedo Marku.

Jahaangal Pool aranal

13

No Barnabas e Pool nuliraa faa ngolla golle Laamdo

¹ Annabaabe e jannginoobe ina ngoni ley kawrital goondinbe gonngal Antiyoki ngaal. Kambe ngoni Barnabas e Simeyon noddireedo Baleejo e Lukiyus mo Sireene e Manahen, mawnidindo e Hirudus hooreejo leydi oon, kam e Sool. ² Nyannde gomma ibe teddina Joomiraado tawi ibe ngondi e suumayeere, ndeen Ruuhu Ceniido wi'i 6e:

—Cenndanee kam Barnabas e Sool saabe gollal ngal noddirmi 6e ngaal.

³ Caggal suumayeere e du'aare mabbe, be njowi juude mabbe e dow yimbe dido been, be nuli dum'en.

⁴ Nii Ruuhu Ceniido nuliri 6e. Be njehi Selewkiya, 6e naati laana maayo manngo 6e pondii ruunde* Kipirus. ⁵ Nde 6e njottinoo Salamis dow ruunde ndeen, 6e mbaajii konngol Laamdo ley cuudi Alhuudiyankoo6e baajordi. Yuhanna bi'eteedo Marku ina wondi e mabbe, ina walla 6e. ⁶ Be peyyiti ruunde ndeen faa 6e njottii ngalluure wi'eteende Pafos. Toon 6e tawi daggada Alhuudiyanke bi'eteedo Bar-Iisaa, biitotoodo wo annabaajo. ⁷ Wo o howruujo kaananke bi'eteedo Sergiya Pool. Oon wo jom hakkillo. O noddi Barnabas e Sool sabo imo yidi nanude konngol Laamdo. ⁸ Ammaa Elimas mo inndem fiirtata «daggada» oon salake 6e. Imo filoo bonnitinde goondinal kaananke oon. ⁹ Ndeen Sool bi'eteedo Pool, kebbinaado Ruuhu Ceniido, ndaari mo faa woodi, ¹⁰ wi'i:

—Bii Iibiliisa! Aan keewdo jamba e hiila, ganyo ko laabi fuu! A selataa oonyude laabi Joomiraado ponnditiidi naa? ¹¹ Joonin jukkungo Joomiraado saaman e maada, a wuman, a yi'ataa naange faa sardi† oon yottoo.

Wakkati oon ni, gite makko cuddini, de nibbi. Imo memmemta, imo filoo dowoowo. ¹² Nde kaananke oon yi'unoo ko wadi duum ndeen, goondini Iisaa. Waaju haala Joomiraado kaan haaynake dum.

No Pool waajorii ley ngalluure Antiyoki

¹³ Pool e yaadiraabe muudum naati laana maayo manngo, ndilli Pafos, njottii Perge ley leydi

* **13:4** Ruunde wo leydi tummbiindi hakkunde maayo manngo.

† **13:11** sardi wo wakkati podanoodo.

Pamfiliya. Doon Yuhanna bi'eteedo Marku seedi e maabbe, yeccii Urusaliima. ¹⁴ Be ndilli Perge, be ngari Antiyoki ley leydi Pisidiya. Be naati waajordu nyalaande fowteteende, be njoodfi. ¹⁵ Caggal janngeede Tawreeta Muusaa e dewte annabaabe, hooreebe waajordu nduun neli be noddee be ngara yeeso muubben. Be mbi'i:

—Sakiraabe, si odon njogii haala cemmbinooha yimbe do fu, kaalee.

¹⁶ Pool ummii, hunci junngo muudsum faa be kakkilana dum, wi'i:

—Israa'iilankoobe e hulbe Laamdo woobbe, ket-tinee: ¹⁷ Laamdo Israa'iilankoobe oon subake maamiraabe meeden, teddinii lenyol maabbe nde ngol hodoynoo leydi Misira ndeen. O yaltiniri be toon baawde makko. ¹⁸ O munyanii[†] be ley ladde faa wadi duubi capande nay. ¹⁹ Caggal ko o halki lenyi jeddi e ley leydi Kanaana, o hokki ndi yimbe makko ndona ndi. ²⁰ Ko be ngoni ley Misira faa warde ko be naati leydi Kanaana fu wadii hono duubi keme nay e capande joy. Caggal diuum, o hokki be sarotoobe faa jamaanu annabi Samuwiila. ²¹ Nde dum faltinoo ndeen, be nyaagii Laamdo hokka be kaananke. Laamdo hokki be Sawulu bii Kis yuurudo e lenyol Benyamin. Oon laamii be duubi capande nay.

²² Ndeen Laamdo borti Sawulu, hokki Daawda laamu. O haali kabaaru muudum, o wi'i: «Mi hebii Daawda bii Yesa gorko belnoowo bernde am, gadoowo muuyde am fuu.» ²³ E yuwdi makko Laamdo wurtini Iisaa, kisinoowo Israa'iila no aadorinoo noon. ²⁴ Fadde Iisaa warude, Yaaya

[†] **13:18** Won binndi bi'udiO nyaamnii be.

waajake yimþe Israa'iila fuu tuuba, lootee lootagal batisima. ²⁵ Katin, nde Yaaya timminannoo golle muudum ndeen, wi'i þe: «Mi wanaa mo miiloton ngonumi oon. Ammaa ina woodi garoowo caggal am, mo mi fotaay fay e habbitinde boggi padé muudum.»

²⁶ Sakiraabé, onon yuwdi Ibrahiima e hulþe Laamdo woþþe, wo enen nuldaa kabaaru kisinoowo o. ²⁷ Sabo wonþe Urusaliima been e hooreeþe muþben fuu annditaay Iisaa. Katin du þe paamaay haalaaji annabaabé janngeteedi nyalaande fowteteende fuu. Annabaabé been mbi'ii Iisaa sarete. Ko þe carii mo duum, þe tabintinii haalaaji diin. ²⁸ Fay si taweede þe keþaay daliili fuu no þe mbarda mo, þe nyaagake Pilaatu o waree.

²⁹ Nde þe ngollunoo ko Binndi diin mbi'i e makko duum faa hiþbi ndeen, þe njippini mo e leggal palaangal, þe ngadí mo e saabeere. ³⁰ Ammaa Laamdo iirtinii mo. ³¹ Balde keewðe o þangani wondunoþe e makko been gilla Galili faa Urusaliima. Been ngoni seedantoþe mo yeeso yimþe joonin. ³² Minen, miden ngaddana on Kabaaru Lobbo: ko Laamdo aadaninoo maamiraabé meeden duum, ³³ yottinanii en, enen taaniraabé muþben. O wadii duum e ley ko o iirtini Iisaa. Noon winndiraa ley jimol Jabuura suura didi:

«Wo a biyam, hannden mi laatake Baaba maa.» §

³⁴ Katin du, Laamdo iirtinii mo e hakkunde maayþe, accaay 6anndu makko nyoli. Noon haaldunoo nde wi'unoo:

«Mi hokkan on barkeeji ceniidí di mbonataa,

dī podaninoomi Daawda diin.»*

³⁵ Dum wadi de o wi'i e Jabuura suura goddo:

«A accataa Ceniido maa nyola.»†

³⁶ Daawda golii ko Laamdo muuyi golla e jamaanu muudum. Caggal duum, o maayi. Banndu makko hawrunduraa e maamiraabe makko, ndu nyoli. ³⁷ Ammaa mo Laamdo iirtini oon nyolaay. ³⁸ Sakiraabe, anndee wo saabe makko de mbaajadon yaafeede hakkeji. ³⁹ Tawreeta Muusaa waawaa wadude neddo ponnditiido. De kanko kaa, goondindo mo fuu, o ndaardan dum ponnditiido. ⁴⁰ Dum le, kaybee taa ko annabaabe cappinoo duum hewtoo on:

⁴¹ «Onon jalnortooße golle am, ndaaree,
de dum haaynoo on, de kalkon!

Sabo mi wadan godsum e ley wakkati moodon,
mo on ngoondintaa fay si neddo haalannoo
on.»‡

⁴² Caggal Pool e Barnabas njaltii waajordu nduun, jamaa oon nyaagii ɓe ɓe ngarta fowteende waroore, faa ɓe njaha yeeso e waaju mabbe. ⁴³ Caggal ko kawrital ngaal wadi duum, Al-huudiyankee heewbe e naatube e diina muñben njokki Pool e Barnabas. Been dido fuu ina kaalda e mabbe, ina tindina ɓe ɓe keddo e moyyere Laamdo.

⁴⁴ Fowteteende jokkunde ndeen, yimbe ngallure ndeen fuu kawriti faa kettinoo konngol Laamdo. ⁴⁵ Ammaa nde Alhuudiyankee been njiinoo jamaa oon ndeen, kiram naati ɓe. Iɓe njedda ko Pool waajotoo duum, iɓe njenna dum.

* **13:34** Esaaya 55.3. † **13:35** Jabuura 16.10. ‡ **13:41** Habakuk 1.5.

⁴⁶ Ndeen Pool e Barnabas kaaldirani 6e tannyoral, mbi'i:

—Waajibi onon min artotoo haalande konngol Laamdo ngol. Ammaa saabe on paddii ngol, on ndaardaay ko'e moodon odon poti hebude nguurndam nduumiidam, min njahan to yimbe 6e nganaa Alhuudiyankoo6e. ⁴⁷ Sabo inan ko Joomiraado yamiri min:

«Mi darnii ma faa laatanodaa lenyi diin annoora,
faa kisinaa haddi adunaaru ndu fuu.»§

⁴⁸ Nde yimbe lenyi goddi diin nannoo haalaaji diin ndeen, ceyii, teddini konngol Joomiraado ngool. Be Laamdo subanii nguurndam nduumiidam been fuu ngoondini.

⁴⁹ Konngol Joomiraado ngool sankitii e leydi ndiin fuu. ⁵⁰ Ammaa Alhuudiyankoo6e been ummini hakkillooji rewbe rewoobe Laamdo saahii6e, kam e mawbe ngallure ndeen. Be ummini torradow Pool e Barnabas, 6e ndiiwi dsum'en leydi maabbe. ⁵¹ Kam'en du piddi colla koyde mu6ben e maabbe, de njehi Ikoniya. ⁵² Taalibaabe been kebbinaa seyo e Ruuhu Ceniido.

14

No Pool e Barnabas mbaajorii ley wuro Ikoniya

¹ Ley Ikoniya du Pool e Barnabas naati e ley waajordu Alhuudiyankoo6e. Ley ko 6e mbaajii duum, Alhuudiyankoo6e e yimbe lenyi goddi heewbe ngoondini. ² Ammaa Alhuudiyankoo6e salii6e goondinde been ummini hakkillooji lenyi

§ **13:47** Esaaya 49.6.

goddi, mbonni 6erde mudden faa mbanya saki-raabe goondinbe been. ³ Ammaa dum fuu hadaay be booyude toon, ihe mbaajoroo haala Joomiraado cuusal, ihe kolla hinney Joomiraado. Yimbe been annditii ko be mbaajotoo duum wo goonga, sabo Laamdo hokki be baawde wadude maandeeji kaayniidi e golleeji kaayniidi. ⁴ Yimbe wuro ngoon peccii: wobbe keedani Alhuudiyankoobe, wobbe du keedani nulaabe been.

⁵ Yimbe lenyi goddi e Alhuudiyankoobe e ardiibe mudden anniyii torrude be e wardude be kaaye. ⁶ Nde be maatunoo dum ndeen, be ndoggani Listara e Derbe e gure seraaji mudden ley leydi Likoniya. ⁷ Toon du ihe mbaajoo Kabaaru Lobbo oon.

No Pool e Barnabas mbaajorii ley wuro Listara

⁸ Ley Listara doon ina woodi gorko bonnguujo, dimdaado e bonngaaku. Abada o yahaay e koyde makko. ⁹ Imo hettinii waaju Pool. Pool ndaari mo, yi'i o goondinii faa imo waawi danneede, ¹⁰ haali semmbe, wi'i:

—Umma, dara e koyde maa!

Gorko oon gurbitii, darii, ina yaha. ¹¹ Nde yimbe been njiinoo ko Pool wadi duum ndeen, mballi, mbi'i e ley haala Likoniya'en:

—Alla'en njippake dow meeden, na nanndinkinii e yimbe!

¹² Be inndiri Barnabas «Jewus», be inndiri Pool du «Hermes»,* sabo Pool wonnoo kaaloowo. ¹³ Suudu tooru mabbe wi'eteendu Jewus ina woni

* **14:12** E ley diina Geresankoobe Jewus woni hooreejo tooruui, Hermes woni nelaado majji.

yaasin ngalluure toon. Almaami oon yuuri toon waddi ga'i maysiniraadi pinndi to dammbude narrude ngalluure toon. Kanko e yimbe been ina njidi wadude di kirsamaaji. ¹⁴ Ammaa nde Barnabas e Pool nannoo dum ndeen, dum metti dum'en faa ceeki kaddule mudden, kenyanii jamaa oon ina peekoo, ¹⁵ ina mbi'a:

—Worße, dume ngadoton do? Minen du min yimbe hono moodon. Miden mbaajoo Kabaaru Lobbo oon faa tuubon, celon golleeji boli di, ngarton e Laamdo buurdo, tagudo kammu e leydi e maayo manngo e ko woni e mudden fuu. ¹⁶ E jamaanuuji paltiidi diin o accii lenyi fuu njokka laabi mudden. ¹⁷ E dum fuu, imo golla ko woodi faa dum seedanoo mboodirka makko. Imo tomnana on yuwoonde, imo benndinana on nyaamri e wakkati muudum. Imo waaltnira hakkillooji mon nyaamdu e seyo.

¹⁸ No Pool e Barnabas mbaajorii nii fu, faa hannden wo e semmbe kadiri jamaa oon hirsande dum'en ga'i diin.

¹⁹ Caggal duum, Alhuudiyankee yuuri Antiyoki e Ikoniya. Be kebi hakkillooji yimbe been faa limni Pool kaaye. Be ndaasi dum, 6e njoppowi dum faa caggal wuro ngoon, sabo 6e miilii wo maaydo. ²⁰ Ammaa nde taalibaabe been ngarnoo piilii mo ndeen, o ummii, o soyyitii ley wuro ngoon.

No Pool e Barnabas njecorii Antiyoki

Jaango majjum, o yaadi e Barnabas wuro wi'eteengo Derbe. ²¹ Nde 6e mbaajinoo toon

Kabaaru Lobbo fu, yimbe heewbe laatii taalibaabe Iisaa. Caggal duum, be njeccii Listara e Ikoniyi, kam e Antiyoki. ²² Ibe beydana taalibaabe semmbe, ibe tindina dum'en keddo e goondinal, ibe mbi'a:

—Sanaa tampen tampiriji keewdi fadde men e naatude laamu Laamdo.

²³ E ley kawrite goondinbe deen fuu, be cubanii dum'en mawbe. Caggal duum, be cuumii, be ndu'ii, be kalfini dum'en Joomiraado mo be ngoondini oon.

²⁴ Nde be ceekunoo leydi Pisidiya ndeen, be ngari leydi Pamfliya. ²⁵ Be mbaajii konngol ngol ley wuro Perge. Caggal duum, be njippowii Ataliya. ²⁶ Toon be naati laana maayo manngo, be pornyii Antiyoki do be kalfinanoo moyyere Laamdo faa be ngolla gollal ngal be tilii ngaal.

²⁷ Nde be njottinoo ndeen, be kawrunduri yimbe kawrital goondinbe ngaal, be kaalani ngal no Laamdo nawtorii be, no o omtirani yimbe be nganaa Alhuudiyankoobe dammbugal goondinal.

²⁸ Be keddii doon faa fooyti, ibe ngondi e taalibaabe been.

15

Haala kawrital gadaangal Urusaliima

¹ Yimbe wobbe yuuri Yahuudiya ngari Antiyoki, ina njanngina sakiraabe been, ina mbi'a:

—Si on taadiraaka hono no Muusaa wi'iri noon fu, on kisataa.

² Pool e Barnabas poodunduri e mabbe, ndukidi e mabbe faa tiidi. Ndelle be tabintini nelde Pool e Barnabas e yimbe wobbe faa Urusaliima, be kaaldowa e nulaabe e mawbe goondinbe been dow

majjam. ³ Ndelle kawrital goondinbe ngaal neli 6e. Be peyyiti leyde Finisi e Samariya, i6e kaalana goondinbe toon haala tuubugol yimbe 6e nganaa Alhuudiyankoo6e. Dum laatanii sakiraabe been fuu seyo manngo. ⁴ Nde 6e njottinoo Urusaliima ndeen, kawrital goondinbe ngaal e nulaabé e mawbe been njabbii 6e. Be kaalani dum'en ko Laamdo gollitiri 6e.

⁵ Ammaa wobbe ley goondinbe jeyaabe e fedde Farisa'en ummii, mbi'i:

—Waajibi 6e taadee, 6e njamiree jokkude Tawreeta Muusaa.

⁶ Nulaabé e mawbe been kawriti faa ndaara haala kaan. ⁷ Caggal ko haalaaji diin keewii, Piy-eer ummii, wi'i 6e:

—Sakiraabe, odon anndi Laamdo subake kam e ley moodon gilla ko 6ooyi. O subake kam faa mi waajoo Kabaaru Lobbo oon hakkunde yimbe 6e nganaa Alhuudiyankoo6e, faa 6e nana, 6e ngoondina. ⁸ Laamdo anndudo berde oon hollii jaabanii 6e, nde hokkunoo 6e Ruuhu Ceniido hono no meeden ni. ⁹ Walaa fuu ko o senndiri en e ma6be, e ley ko o laabiniri berde ma6be e goondinal. ¹⁰ Joonin, ko wadi de odon ndaartindoo Laamdo? Odon njowa e taalibaabe been donngal ngal enen e maamiraabe meeden fuu en mbaawaay ronndaade. ¹¹ A'aa. Wo moyyere Joomiraado meeden Iisaa de tannyorden hisineede. Hono noon kambe du.

¹² Kawrital ngaal fuu deyyinii siw, ina hettinii ko Barnabas e Pool pillotoo no Laamdo hokkiri dum'en wadude maandeeji kaayniidi e kaayefiji

hakkunde lenyi goddi. ¹³ Nde 6e kettinnoo haalaaji
diin faa woodi fu, Yaakuuba 6eydi haala, wi'i:

—Sakiraabe, kettinanee kam! ¹⁴ Simon humpiti
en no Laamdo artorii hakkilande yimbe 6e
nganaa Alhuudiyankoo6e, faa wada dum'en yimbe
muudum. ¹⁵ Dum hawrii e haalaaji annabaabe
diin, hono no winndiraa ni:

¹⁶ «Joomiraado wi'i:

Caggal duum, mi wartan,

 mi nyibtoo suudu Daawda saamundu nduun,
 mi fonndita ko boni e mayru,
 mi darna ndu katin,

¹⁷ faa yimbe heddiibe fuu tewta Joomiraado,
 lenyi di noddammi fuu, faa laatoo yimbe am.

¹⁸ Joomiraado tabintindo kulle de anndunoo
 wadan gilla arande, kam wi'i noon.»*

¹⁹ Dum saabii miin kaa ko nji'umi, taa tiidinanen
lenyi goddi tuubudi ngarti e Laamdo diin.

²⁰ Ammaa mbinndanen 6e 6e ndeentoo e ko
tooruugi tuunini e jeenu e nyaamude ko saadi
e nyaamude yiayam. ²¹ Gilla e jamaanuuji booydi,
Tawreeta Muusaa ina jannginee ley gure deen
fuu, i6e njannga dum nyalaande fowteteende fuu
ley cuudi baajordi.

Haala bataaki yaade to goondinbe 6e nganaa Alhuudiyankoo6e

²² Ndeen nulaabé been e mawbe e kawrital
goondinbe ngaal fuu paamiri faa cuboo worbe e
ley mubben faa nela dum'en Antiyoki, 6e njaada
e Pool e Barnabas. Be cubii Yahuuda bi'eteedo
Barasaba, kam e Silas. Dido been fuu wo ardiibe

* **15:18** Amos 9.11-12.

ley sakiraabé goondinbé. ²³ Inan bataaki ki 6e kokki dum'en:

Minen sakiraabé moodon nulaabé e mawbé, miden njowta on, onon sakiraabé amin lenyi goddi gondi Antiyoki e Siiriya e Silisi.

²⁴ Min nanii yimbé yuurubé to amin mettinirii berde moodon haalaaji, njiibii hakkilooji moodon. Minen le, min njamiraay 6e.

²⁵ Min ndawridii, min paamiri min cuboo worbé faa min nela dum'en to moodon, 6e njaada e yigiraabé amin horsubé Barnabas e Pool,

²⁶ farritinbé† yonkiji mubbén saabe Joommen Iisaa Almasiihu. ²⁷ Dum wadi de min neli Yahuuda e Silas, paamina on ko min mbindi e moodon duum hunnduko e hunnduko.

²⁸ Minen e Ruuhu Ceniido, min anniyake taa min njowa on donje teddude si wanaa ko tilsi duum: ²⁹ ndeentodon e kirsanaadi tooruucci e yiiyam e ko saadi e jeenu. Si on ndeenii ko'e moodon e kujje de, on ngadii ko woodi. Laamdo reena en!

³⁰ Woodi, 6e kokkaa laawol, 6e njehi Antiyoki. Nde 6e njottinoo ndeen, 6e kawrunduri kawrital goondinbé ngaal, 6e kokki ngal bataaki kiin. ³¹ Nde been janngunoo ki ndeen, ceyii sabo haalaaji diin cemmbinii berde mubbén. ³² Yahuuda e Silas wo annabaabé. Be mbaaltiniri berde sakiraabé e haalaaji keewdi, 6e cemmbini dum'en. ³³ Nde 6e booytunoo toon seeda fu, 6e ceedi e sakiraabé been e dow jam, 6e njeccii to nelnoobé 6e toon. [³⁴ De

† **15:26** Farritaade wo rafi reenude yonki muudum.

Silas, kam kaa, heddi toon.]‡

³⁵ Pool e Barnabas keddii ley Antiyoki doon. Kam'en e wobbe heewbe ina njanngina ina mbaajoo konngol Joomiraado.

Jahaangal Pool fidabal

No Pool e Barnabas ceediri

³⁶ Caggal balde seeda, Pool wi'i Barnabas: —Njeccoden e gure de mbaajinoden konngol Joomiraado deen fuu, njippanoden sakiraabe meeden been, ndaaren no be ngorri.

³⁷ Barnabas ina yidi be njaada e Yuhanna bi'eteedo Marku. ³⁸ De Pool kaa muuyaay be njaada e gorko oon, sabo oon seediino e mabbe Pamfiliya, yaadaay e mabbe faa gollida e mabbe. ³⁹ Barnabas e Pool luuri faa ceedi. Mono e mabbe fuu subii neddo goddo. Barnabas yaadi e Marku, naati laana maayo, fonndii ruunde§ Kipirus. ⁴⁰ Pool du subii yaadude e Silas. Sakiraabe been kalfinii be e hinney Joomiraado de be ndilli. ⁴¹ Be ndewi leyde Siiriya e Silisi, ihe cemmbina kawrite goondinbe deen.

16

No Timote yaadi e Pool e Silas

¹ Pool wari Derbe. Caggal duum, o yottii Listara. Goondindo bi'eteedo Timote ina tawaa doon. Inniiko wo Alhuudiyanke goondindo, de baabikko wo neddo yuurudo Geres. ² Sakiraabe wonbe Listara e Ikoniya been ina ceedanoo mo wo o

‡ **15:34** E dereeji booydi, goddi ngalaa aaya 34. § **15:39** Ruunde wo leydi tummbiindi hakkunde maayo manngo.

lobbo. ³ Pool ina yidi faa o yaada e mudden. Ndelle yaari mo faa o taadee tafon, sabo Alhuudiyankoobe wonbe e leyde deen been fuu ina anndi baabiiko wo yuurudo Geres. ⁴ Ley gure de be peyyiti deen, ibe njottinana goondinbe jamirooje de nulaaße e mawbe wonbe Urusaliima been kolli be njokka. ⁵ Hono noon, kawrite goondinbe deen ina 6eydoo semmbe ley goondinal, ina 6eydoo heewude nyannde fuu.

No Pool noddiraa Makedoniya

⁶ Ruuhu Ceniido hadi be waajaade konngol ngol ley Aasiya. Saabe majjum be ndewi leydi Firigiya e leydi Galaatiya. ⁷ Nde be ngarnoo keerol Misiya ndeen, be pilii yaade Bitiniya, ammaa Ruuhu Iisaa accaay be naata. ⁸ Saabe duum, be paltii Misiya, be naati e wuro wi'eteengo Torowas. ⁹ Jemma oon, Pool hebi holleede. O yi'i gorko Makedoniyanke ina darii, ina nyaagoo mo ina wi'a:

—Ngaraa Makedoniya, mballaa min!

¹⁰ Nde Pool yiinoo ko hollaa dum ndeen, wakkati oon ni, filii yahude Makedoniya. Min tannyorii Laamdo noddii min faa min mbaajoo be Kabaaru Lobbo.

No Lidiya goondiniri waaju Pool ley Filipi

¹¹ Hono noon, min naati laana maayo yuuruka Torowas, min ponndii ruunde Samotaras. Jaango majjum, min ponndii Neyapolis. ¹² Min yuwi doon, min ponndii Filipi. Filipi wo ngalluure mawnde e leydi Makedoniya nde Romankooße ndawranta. Min ngadi balde seeda doon. ¹³ Nyalaande fowteteende, min njaltiri wuro ngoon hedde daande maayo to min miili Alhuudiyankoobe na

mboownoo wadude du'aare. Min tawi doon rewþe ina kawriti. Min njoodii, min mbaajii þe. ¹⁴ Gooto maþþe wo debbo jokkudo Laamdo bi'eteedo Lidiya. Wo o connoowo kaddule bodeeje, jeyaado ngalluure wi'eteende Tiyatira. Imo hettindii waaju oon, de Joomiraado omtí bernde makko faa o jaba ko Pool waajotoo duum. ¹⁵ Kanko e koreeji makko fuu þe lootaa lootagal batisima. Caggal duum, o nyaagii min, o wi'i:

—Si odon tiigori kam mi goondindo Joomiraado fu, ngaree suudu am, mbeeranon kam.

O tilsinani min faa min njabi.

No Pool e Silas ngattiraa ley kasu

¹⁶ Nyannde wootere miden njaha to nokkuure wadirde du'aare. Kordo gondudo e ginnaaru hawriti e amin. Wo o ji'oowo ko warata. Joomiraabe makko keþii kaalisi keewdo e ndaggadaaku makko nguun. ¹⁷ O jokki min, minen e Pool, imo feekoo, imo wi'a:

—Yimþe þe wo gollanoobe Laamdo Toowðo! Iþe mbaajoo on laawol kisindam!

¹⁸ Balþe keewde imo wada noon faa bernde Pool ummii, hucciti e makko, wi'i ginnaaru nduun:

—Saabe Iisaa Almasiihu, yaltu e debbo o!

Ginnaaru nduun yalti wakkati oon pay. ¹⁹ Nde joomiraabe kordo oon paamunoo laawol muþben hemrude ceede e makko timmii fu, nanngi Pool e Silas, ndaasi ðum'en ngaddi faa ley luumo yeeso sarotoobe wuro ngoon. ²⁰ Ndeen þe njaari ðum'en to hooreeþe, þe mbi'i:

—Worþe ðido þe wo Alhuudiyankooþe. Iþe ngadda baasi e wuro meeden ngo. ²¹ Iþe mbaajoo

al'aadaaji di ndaganaaki en njaben naa ngollen,
sabo en Romankooße.

²² Jamaa oon ummanii 6e. Hooreeße been
njamiri 6e bortee kaddule mabbe, de 6e piiree
loosi. ²³ Be piyaa faa naawi, 6e paddaa ley kasu.
Hooreeße been njamiri kayboowo kasu oon hayba
6e faa wooda. ²⁴ Oon le, nde hebunoo yamiroore
ndeen fu, nanni 6e e ley suudu kasu hakkundeeru.
O geyyiri koyde mabbe geyyelle ledde.

²⁵ Hakkunde jemma oon, Pool e Silas ina ngada
du'aare, ina njimana Laamdo. Kasunkooße wobbe
been du ina kettindanii 6e. ²⁶ De wakkati gooto,
leydi dimmbii dimmbagol manngol faa joyyinirde
kasu deen njergii. Wakkati oon du, dammbude
deen fuu omtii, geyyelle kasunkooße deen fuu
kabbitii. ²⁷ Nde kayboowo oon finnoo de yi'i
dammbude kasu deen ina omtii fu, soorti kaafaahi
muudum faa waritoo, miilii kasunkooße been
ndoggii. ²⁸ Pool yeewnii faa toowi, wi'i mo:

—Taa wađu hoore maa ko boni, min fuu do min
ngoni!

²⁹ Ndeen kayboowo oon ḥaarii jaynorgol. O
doggiri kasu to Pool e Silas ngoni toon, o hippii
yeeso muđben, heddi imo diwna. ³⁰ Caggal duum,
o wurtini 6e, o wi'i 6e:

—Joomiraabe, noy kaanumi wađude faa mi
hisa?

³¹ Be njaabii mo, 6e mbi'i:

—Goondin Iisaa Joomiraado, ndeen a hisan, aan
e koreeji maa fuu.

³² Be mbaajii mo konngol Joomiraado, kanko e
koreeji makko fuu. ³³ Faa 6ooyti seeda, ley jemma
oon o yaari 6e, o lootowi barme mabbe. Wakkati

oon du o lootaa lootagal batisima, kanko e koreeji makko fuu.

³⁴ O nanni Pool e Silas suudu makko, o hokki dum'en nyaamdu. Kanko e koreeji makko fuu 6e ceyii sabo 6e kebii goondinde Laamdo. ³⁵ Nde weetunoo ndeen, hooreebe Romankoo6e neli yim6e laamu mbi'a kayboowo oon yoppa wor6e dido been. ³⁶ Kayboowo oon haalanowi dum Pool, wi'i:

—Hooreebe been nulii njoppedon. Mburtee joonin, njehee e jam.

³⁷ Ammaa Pool jaabii, wi'i:

—Be njamirii min piyee yeeso yim6e tawa min caraaka, fay si min dido fuu min Romankoo6e. Be nanni min e kasu. Joonin 6e njaltiniran min cuncukka naa? Dum kaa latataako. Sanaa kambe e ko'e mabbe, 6e ngara 6e njaltina min!

³⁸ Yim6e laamu been kaaltani hooreebe Romankoo6e been haala kaan. Been kuli nde nannoo Pool e Silas wo Romankoo6e ndeen. ³⁹ Be njehi, 6e curowi dum'en, 6e mburtini dum'en kasu toon. Be nyaagii dum'en ndilla wuro ngoon. ⁴⁰ Nde Pool e Silas njaltunoo e kasu ndeen, naati galle Lidiya. Be nji'i sakiraabe been, 6e cemmbini berde mu6ben. Caggal dum, 6e ndilli.

17

No Pool e Silas mbaajorii ley Tesaloniiki

¹ Pool e Silas peyyiti Amfipolis e Apoloni faa njottii Tesaloniiki. Ina woodi waajordu Alhudiyan6e toon du. ² Pool wadi no woowri, naati ley waajordu nduun. Nyalaade powteteede tati imo liddundura e mabbe imo fiirtana 6e Binndi diin. ³ O fiirtani 6e, o holli 6e ina tilsunoo

Almasiihu oon torree, ummintinee e maayde. O wi'i 6e:

—Iisaa mo mbaajotoomi on haala muudum oon, kam woni Almasiihu.

⁴ Wobbe maabbe tannyori dum goonga, njokki mo, kanko Pool, e Silas. Yimbe Geresankooбе rewoobe Laamdo heewbe e rewbe saahiiбе duudube du njokki 6e. ⁵ Alhuudiyankooбе 6e nganaa goondinbe been kiri Pool e Silas, nanngi yimbe huyfube yiilotoobe ley luumo, kawrunduri dum'en. Be njirkiti ngalluure ndeen fuu. Be naati e galle Yason, i6e piloo Pool e Silas faa 6e njaara dum'en yeeso yimbe wuro. ⁶ Nde 6e kunnginoo yiitude dum'en ndeen, 6e ndaasi Yason e sakiraabe wobbe, 6e ngaddi dum'en to sarotoobe ngalluure ndeen, i6e peekoo, i6e mbi'a:

—Yimbe umminoobe baasi e aduna o fuu ngarii do. ⁷ Yason weerni dum'en! Be fuu ko 6e ngadata duum ina luttunduri e sariya kaananke Roma mawso oon. I6e mbi'a kaananke goddo ina woodi, bi'eteedo Iisaa.

⁸ Haalaaji diin njirkiti jamaa oon e sarotoobe ngalluure ndeen. ⁹ Sarotoobe been njomnii Yason e wondube e muudum been, njabi buudi diin, de njoofi dum'en.

No yimbe Bereya njabborii Kabaaru Lobbo

¹⁰ Jemma oon pay, sakiraabe been neli Pool e Silas Bereya. Nde 6e njottinoo ndeen, 6e njehi to waajordu Alhuudiyankooбе. ¹¹ Yimbe wonbe doon ina buri Alhuudiyankooбе wonbe Tesaloniiki been jikku lobbo. Be njakkitorii konngol Pool ngool e juude didi. I6e piloo ley Binndi diin nyande fuu faa 6e ndaara yalla ko Pool waajii duum

wo goonga. ¹² Heewþe e maþþe ngoondini, kam e rewþe Geresankoþe saahiiþe e worþe Geresankoþe heewþe. ¹³ Nde Alhuudiyankoþe Tesa-loniiki paamunoo Pool waajake konngol Laamðo ley Bereya ndeen, þe ngari toon, þe njirkiti jamaa oon, þe ummini hakkillooji muþben. ¹⁴ Wakkati oon fu, sakiraabe been neli Pool to maayo manngo faa hooya laana, de Silas e Timote keddii doon. ¹⁵ Dowtube Pool been njaadi e muudum faa Ateena. Pool yeccini þe Bereya faa þe kaalana Silas e Timote ngara to muudum law.

*No Pool waajorii ley ngalluure wi'eteende
Ateena*

¹⁶ Pool ina doomi þe Ateena fadde maþþe warude. Bernde muudum naawi sanne ko yi'i no ngalluure ndeen foti heewde tooruuji noon. ¹⁷ Dum wadi de o haaldi e Alhuudiyankoþe e rewoþe Laamðo wonþe ley waajordu nduun. Nyannde fuu imo haalda e yimþe wuro ngoon taliyaare to þe kawritata toon. ¹⁸ Wobþe ley filo-toþe paamal wi'eteþe Epikuri'en e Sitoyko'en njaabunduri e makko. Wobþe ina mbi'a:

—Dume borbortoo wo o haalata?

Wobþe du ina mbi'a:

—Imo nanndi e baajotoodo haala tooruuji janani.

Walaa ko þe mbiiri noon si wanaa haala Iisaa e ummital maayþe o waajinoo þe.

¹⁹ Ndeen þe kooyi Pool, þe njaari dum waamnde to kawrital Areyopagus* wadata. Be mbi'i dum:

* **17:19** Areyopagus wo kawrital 6urngal fuu toowude e ardiïþe ngalluure Ateena.

—Miden njidi anndude diina keso mo mbaajotodaa oon. ²⁰ Si goonga, ada tööba e noppi amin haalaaji ði min mboowaa nanude. Miden njidi anndude maanaa majji.

²¹ Tawi Ateenankooþe e jananþe joodiise toon 6een ngollataa huunde fuu si wanaa hettindaade huunde heyre naa fillitaade nde.

²² Ndeen Pool darii hakkunde kawrital Areyopagus, wi'i:

—Ateenankooþe, mi yi'ii on yiduþe diina moodon sanne. ²³ Sabo ko njiiltiimi e ngalluure moodon duum, mi yi'ii cuudi moodon dewirdi, mi tawii ina winndaa e ittirde sadaka wootere: «Saabe Alla mo anndaaka».† Ndelle, Alla mo on anndaa oon, kam mbaajotoomi on. ²⁴ Laamdo tagudo adunaaru e ko woni e muudum fuu oon, kam woni jom kammu e leydi. O jodataako ley cuudi nyibiraadi juude. ²⁵ O haajaaka yimþe ngollana mo fay huunde, sabo kanko hokkata tageefo ngoon fuu nguurndam e foofaango e huunde fuu. ²⁶ E neddo gooto Laamdo wurtiniri lenyi ðiin fuu, joyyini dum'en e adunaaru ndu. Gilla dum wadaay, o darnii wakkatiji e keeri kodorde mußben. ²⁷ Laamdo wadii dum faa 6e piloo dum, 6e memmemta faa 6e njiita dum. E dum fuu o woddaaki fay gooto e meeden. ²⁸ Kam wadi de eden mbuura, eden njaha, eden ngoni do. Hono noon du yimoþe moodon woþþe mbi'i: «Enen du, en yuwdi makko.»

²⁹ Sabo en yuwdi makko, en kaanaa miilaade imo nanndi e tooru moyyiniraandu kanje naa

† ^{17:23} Ateenankooþe ngadî e rewruude innde alla mo anndaaka, taa tooru ndu 6e njeggiti fuu mettina.

cardi naa hayre sehaande, nde neddo moyyinirta nyeenyal e hakkillo. ³⁰ Laamdo rewidaaki yimbe nde ngonnoo ley majjere ndeen. Joonin, o yamirii yimbe fuu tuuba do tawaa fuu. ³¹ Sabo o wadii nyannde nde o sarotoo adunaaru ndu e fonnditaare. O sarortoo dum e neddo mo o subii oon. O hollii yimbe fuu dum wo goonga nde o ummintonnoo neddo oon e maayde.

³² Nde 6e nannoo Pool ina waajoo haala ummital maaybe ndeen, wobbe na njalnoroo mo, de wobbe na mbi'a:

—Min kettindoto waaju maa o nyannde wonnde.

³³ Nii Pool wurtorii ley mabbe. ³⁴ Wobbe njokki mo, ngoondini. Gooto mabbe ina wi'ee Diyonisius, jeyaado e kawrital Areyopagus. Kam e debbo bi'eteedo Damaris, e wobbe katin du ngoondini.

18

No Pool golliri ley ngalluure wi'eteende Korintu

¹ Caggal duum, Pool dilli Ateena, yehi Korintu. ² O tawi toon Alhuudiyanke bi'eteedo Akila, jeyaado leydi mbi'eteendi Ponta. Booyaay ko oon e deekum bi'eteedo Pirisilla yuuri Itali, sabo Kalawdiyus kaananke mawdo oon yamiriino Alhuudiyankoobe fuu mburtoo Roma.* Pool yehi ndaarude 6e. ³ O wondi e mabbe doon, imo gollida e mabbe sabo wo o gadoowo hukumuiji hono no mabbe ni. ⁴ Nyalaande fowteteende fuu, Pool ina

* **18:2** Yamiroore Kalawdiyus riiwude Alhuudiyankoobe Roma ndeen darnamaa hitaande 49 naa 50 caggal rimeede Iisaa.

liddundura e Alhuudiyankooće e Geresankooće ley waajordu. Imo filoo faa ɓe ngoondina.

⁵ Nde Silas e Timote yuurnoo Makedoniya njotii Korintu ndeen, Pool watti hakkillo muudum fuu e waajaade, ina seedanoo Alhuudiyankooće been Iisaa woni Almasiihu. ⁶ Ammaa saabe ko ɓe calanii mo, iɓe njenna mo, o fiddi kaddule makko, o wi'i ɓe:

—Si Laamdo jukkake on fu, wo feloore moodon! Miin kaa, mi walaa feloore. Gilla joonin mi yahan to ɓe nganaa Alhuudiyankooće.

⁷ O dilli doon, o yehi to gorko jokkudo Laamdo, bi'eteedo Tiitu Yustus, mo galle muudum takkii e waajordu nduun. ⁸ Kirispus, hooreejo waajordu nduun oon, kam e koreejii muudum fuu ngoondini Joomiraado. Heewɓe e Korintunkooće hettindiibé been ngoondini, de lootaa lootagal batisima.

⁹ Jemma gooto Joomiraado haaldi e Pool ley holleede, wi'i:

—Taa hulu, taa deyyina. Waaja, ¹⁰ sabo mido wondi e maada. Fay gooto waawaa torrude ma. Mido woodi yimɓe heewɓe ley ngalluure nde.

¹¹ Pool joodii hakkunde mabbe hitaande e lebbi jeegom, ina janngina ɓe konngol Laamdo.

¹² Nde Galliyo laaminoo leydi Akaya ndeen, Alhuudiyankooće paamiri, ummanii Pool, njaari dum suudu sariya, ¹³ peli dum, mbi'i:

—Gorko o na nannga hakkillooji yimɓe faa ndewra Laamdo e laawol ngol wanaa Tawreeta Muusaa.

¹⁴ Pool anniyii faa jaaboo ɓe, de Galliyo wi'i Alhuudiyankooće been:

—Alhuudiyankoobé, si tawii wo toonya naa gollal bonngal o wadi on, mi jabanan on ko mbullitidon dow makko duum. ¹⁵ Ammaa wo dum jeddi dow haalaaji diina moodon e inde tan. Wo jeddi dow sariya moodon onon. Ndelle sanaa carodon onon e ko'e moodon. Miin kaa, mi sarataako kulle deen!

¹⁶ Caggal duum, o wurtini be suudu sariya nduun. ¹⁷ Joonin le, be fuu be nanngi Sosteni, hooreejo waajordu nduun, be piyi dum yeeso suudu sariya doon. Ammaa e dum fuu Galliyo hillaka fey.

No Polyeccorii Antiyoki

¹⁸ Pool booyti doon balde keewde. Caggal duum, o waynunduri e sakiraabe been, o naati laana, o fonndii Siiriya, kanko e Pirisilla e Akila. Fadde makko naatude laana kaan, o labi hoore makko nokku bi'eteedo Kankiriya saabe ko o hunii Laamdo. ¹⁹ Be njottii Efeesu. Pool yoppi doon Pirisilla e Akila. Kam kaa naati waajordu ina liddundura e Alhuudiyankoobé been. ²⁰ Be nyaagii mo o wonda e maabbe, de o jabaay. ²¹ Nde o waynundurannoo e maabbe ndeen, o wi'i:

—Mi wartowan to moodon si Laamdo jabii.

O naati laana, o dilli Efeesu. ²² O yehi faa o yottii Kaysariya, de o yeenti Urusaliima faa o jowta kawrital goondinbe ngaal. Caggal duum, o yehi Antiyoki.

Jahaangal Pool tatabal

²³ Pool booyti toon seeda de dilli. O feyyiti leydi Galaatiya e leydi Firigiya, imo yaha imo semmbina berde taalibaabe toon fuu.

No Apolos waajorii ley Efeesu e Korintu

²⁴ Alhuudiyanke bi'eteedo Apolos, dimaado Ale-sandiri, wari Efeesu. Wo o baawdo haala, anndudo Binndi diin, ²⁵ janngudo laawol Joomiraado. Imo teenji e waaju sanne, imo janngina kabaaru Iisaa faa laabá. De wo lootagal batisima ngal Yaayaa wadunoo ngaal tan o anndi. ²⁶ Imo waajoroo tannyoral e ley waajordu nduun. Nde Pirisilla e Akila kettindaninoo mo fu, njaari mo, piirtani mo laawol Laamdo ngool, ɓeydani mo ko o anndaano. ²⁷ Nde Apolos anniyinoo yaade leydi Akaya ndeen, sakiraabe been mballi mo. Be mbinndani taalibaabe wonbe toon been bataaki njabboo mo faa wooda. Nde o yottinoo toon ndeen, o walli goondinbe been e dow moyyere Laamdo sanne. ²⁸ Sabo imo yedda Alhuudiyankoobe imo liba haala muğgen hakkunde yimbe, imo hollira dum'en ley Binndi Ceniidi wo Iisaa woni Almasihu.

19

No Pool semmbindiniri goondinbe ley Efeesu

¹ Nde Apolos wonnoo Korintu ndeen, Pool jokki laawol ley baamle, yehi Efeesu. O tawi toon taalibaabe. ² O yami dum'en, o wi'i:

—Nde ngoondinnodon ndeen yalla on kebii Ruuhu Ceniido naa?

Be njaabii mo:

—Min nanaay yalla Ruuhu Ceniido ina woodi du, sakko min kebá.

³ O yami ɓe, o wi'i:

—Ndelle, lootagal batisima ngale kebudson?

Be njaabii, ɓe mbi'i:

—Lootagal batisima Yaayaa ngaal.

⁴ Pool wi'i:

—Yaayaa lootirii yimbe batisima tuubugol hakke, ina wi'a yimbe been ngoondina garoowo caggal muudum oon, dum woni Iisaa.

⁵ Nde 6e nannoo dum ndeen, 6e lootaa lootagal batisima dow innde Iisaa Joomiraado. ⁶ Nde Pool yownoo juude muudum dow maabbe fu, Ruuhu Ceniido jippii e maabbe, ibe kaalda demle janane, ibe kaalda annabaaku. ⁷ Ibe ngada hono yimbe sappo e dido.

⁸ Pool naati e ley waajordu nduun, ina waajoroo 6e tannyoral haddi lebbi tati. Imo haalda e maabbe, imo liddundura e maabbe, imo filoo faaminde 6e haala laamu Laamdo. ⁹ Ammaa yoorbe berde na ngoni ley maabbe, njabaay goondinde, ina mbonna laawol Joomiraado ngool yeeso yimbe fuu. Dum wadi de Pool seedi e maabbe, yaari taalibaabe been feere, ina waajoo dum'en nyannde fuu e ley jangirde neddo bi'eteedo Tiranus. ¹⁰ O golliri noon faa hiibi duubi didi, faa joodiibe e leydi Aasiya been fuu nani konngol Joomiraado ngool, gilla e Alhuudiyankoobe faa e Geresankoobe.

¹¹ Laamdo hokki Pool waafude kaayefiji mawdfi. ¹² Fay tekke e kaddule meemude banndu makko ina njaaree, njowee e dow nyawbe. Nyawbe been ndada e nyawuuji mubben, ginnaaji na mburtoo e mubben. ¹³ Wobbe ley Alhuudiyankoobe na njiloo faa ndiiwa ginnaaji. Be pilii riiwrude dum'en e innde Iisaa, 6e mbi'i:

—E Innde Iisaa mo Pool waajotoo haala muudum oon, njaltee!

14 Gooto e hooreeþe almaami'en, Alhuudiyanke bi'eteedo Sikewa, 6ibþe muudum worþe njedðo ngadii noon, **15** faa ginnaaru jaabii dum'en, wi'i:

—Mido anndi Iisaa, Pool du mido anndi haala muudum. De onon kaa, wo on þeye?

16 Nedðo gondudo e ginnaaru oon hipporii 6e semmbe faa jaalii 6e, torri 6e faa 6e ndoggi. Be njalti suudu nduun galli boli barmudi. **17** Kabaaru majjum sankitii hakkunde Alhuudiyankooþe e Geresankooþe joodiibë Efeesu fuu. Kulol nangi 6e fuu, innde Iisaa Joomiraado teddinaa. **18** Heewþe e goondinþe been ngari, kaalti lutti di ngadunoo. **19** Dabarankooþe heewþe kawrunduri dewte muþben, mbuli de yeeso yimþe fuu. Be kiisii coggu majje, 6e tawi ina wada buudi cardi ujunaaje capande joy.* **20** Hono nii, haala Joomiraado kaan þeydori sinkitaade e heewude semmbe.

No fitina mawðo wadíri ley Efeesu saabe laawol Joomiraado

21 Caggal duum, Pool siini feyyitinde Makedoniya e Akaya faa fonndoo Urusaliima. O wi'i:

—Si mi tilake toon fu, tilay mi yaha Roma du.

22 O neli gollidoþe e makko dido, Timote e Erasta, njaha Makedoniya. Kanko kaa, o heddii leydi Aasiya seeda. **23** Wakkati oon, fitina mawðo wadi saabe laawol Joomiraado ngool. **24** Baylo tafoowo cardi bi'eteedo Demetirus ina tafa cuuroy cardi nanndukoy e suudu tooru wi'eteendu Artemis. Imo heþa e majjum tino heewngo, kanko e gollooþe makko. **25** O hawrunduri dum'en,

* **19:19** Dum hawrata e golle jokolle faa wada duubi hemre e capande joy.

kam'en e gollooße golle juude hono mabbe, o wi'i
6e:

—Yigiraabe, odon anndi wo e gollal ngal jawdi
meeden fuu yuuri. ²⁶ Odon nji'a, odon nana
no Pool oon hebiri hakkillo yimbe heewbe, ina
wosina dum'en, wanaa ley Efeesu do tan, ley leyde
Aasiya fuu. Imo wi'a 6e kulle deweteede de yimbe
moyyiniri juude mubben deen nganaa deweteede.
²⁷ Si jokkirii nii fu, yimbe mbonnan golle meeden.
Wanaa dum tan, yimbe ndaardan suudu tooru
Artemis nduun du hono bolum. Yimbe celan ted-
dinde tooru meeden mawndu ndu wonbe Aasiya
e adunaaru ndu fuu ndewata nduun.

²⁸ Nde 6e nannoo haalaaji diin ndeen, 6erde
mabbe kubbi, heddii i6e peekoo, i6e mbi'a:

—Artemis Efeesunkooße wo mawdo! Artemis
Efeesunkooße wo mawdo!

²⁹ Ngalluure ndeen fuu jiiyii. Jamaa oon fuu
doggiri taliyaare fijo ndeen. Be ndaasi Gayus
e Aristarka Makedonyankoobe, yaadiraabe Pool
been. ³⁰ Pool ina yidi naatude hakkunde jamaa
oon, ammaa taalibaabe been kadi mo. ³¹ Wobbe
ley hooreebe leydi Aasiya, yigiraabe makko, neli
e makko ina nyaagoo mo taa o naata taliyaare
toon. ³² Wakkati oon, jamaa oon ina jiiyii sanne.
Bee do ina mbullana dum, bee to ina mbullana
dum ga. Ko buri heewude e yimbe been, anndaa
fay ko waddi dum'en doon. ³³ Yoga e jamaa oon
kaaltani haala ka gorko bi'eteedo Alesandere mo
Alhuudiyankoobe been ngadi kaaloowo mubben.
Alesandere muuyi jakkanaade yimbe muudsum
been, de huncani jamaa oon junngo faa haalda
e mubben. ³⁴ Ammaa nde 6e annditinnoo wo o

Alhuudiyanke ndeen, 6e fuu 6e keddii i6e yeewnoo faa wadi leeruuji didi, i6e mbi'a:

—Artemis Efeesunkoobé wo mawdo!

³⁵ Ko sankitii, binndoowo ngalluure ndeen deyyini jamaa oon, wi'i:

—Onon Efeesunkoobé, ngalluure Efeesu nde woni hayboore suudu dewal Artemis deweteedo mawdo oon, kam e natal muudum yuurungal dow kammu ngaal. Yimbe fuu na anndi dum. ³⁶ Fay gooto waawaa yeddude dum. Ndelle odon njeyi jippinde hakkillooji moodon taa ngolliron fay huunde e henyaare. ³⁷ Woré 6e ngaddudon been, nganaa wujjoobé kulle suudu dewal, nganaa yennoo6e deweteedo meeden oon. ³⁸ Si tawii Demetirus e tafoobé cardi been ina ngoodi ko njidi wullitaade fu, nyalaade careteede ina ngoodi, sarotoobé du na ngoodi. ³⁹ De si na woodi ko pilotodon ko buri dum fu, wo to kawrital saahiibé dum saroytee. ⁴⁰ Eden mbaawi felireede muurtere wadunde hannden ndeen, sabo fitina ga'udo nii walaa sabaabu fay gooto.

Caggal haalaaji diin, o yoofi jamaa oon sankitii.

20

No Polyaari leyde Makedoniya e Geres

¹ Nde fitina oon faltinoo ndeen, Pool hawrunduri taalibaabé been, de semmbiniri dum'en e haala. Caggal duum, waynii dum'en, fonndii Makedoniya. ² O yiiltii ley leydi ndiin, imo semmbina yimbe toon e waajuuji keewdi. Caggal duum, o yottii Geres. ³ O wadi toon lebbi tati. Nde o segilinoor faa o naata laana yaade Siiriya fu, o nani Al-huudiyankoobé ndawridii faa mbara mo. Ndelle

o anniyii yeccoraade laawol Makedoniya. ⁴ Inan yaadiraabe makko: Sopater bii Pirrus jeyaado Bereya, e Aristarka e Sekundus jeyaabe Tesaloniiki, e Gayus jeyaado Derbe, e Timote. Woodi du Tikiku e Torofim jeyaabe leydi Aasiya. ⁵ Been ardi min, ndoomowi min wuro wi'eteengo Torowas. ⁶ Minen, min naati laana yaade Filipi caggal iidi buuru mo wattaaka rabilla. E ley balde joy min kewti 6e Torowas, min ngadi doon jeddiire.

No Pool iirtiniri Ewtikus

⁷ Nyannde arandeere e jeddiire, tawi miden kawriti faa min keltoo buuru.* Pool ina waajoo yimbe been, sabo imo anniyii dillude jaango majjum. O heddii e waaju oon faa hakkunde jemma. ⁸ Lampe keewde ina ngoni e ley suudu dowuuru ndu min kawriti ley muudum nduun. ⁹ Suka jokolle bi'eteedo Ewtikus ina joodii dow feneetere. Ko Pool juutini waaju muudum oon duum, Ewtikus ɻonji, faa daanii doyngol teddungol. O saami yuuwde e feneetere sooro tatabo ngoon. Nde 6e kuncunoo mo ndeen, tawi o maayii. ¹⁰ Ammaa Pool jippii, hippii e makko, hooyi mo e juude muudum, wi'i:

—Mbaaltee! Yonki makko wartii!

¹¹ Ndeen Pool yeenti, heltii buuru, nyaami. Caggal duum, o warti e waaju makko faa weeti, de o dilli. ¹² Suka jokolle oon hooraa ina wuuri. Dum waaltini 6erde mabbe sanne.

No Pool waynorii hooreebe goondinbe wonbe Efreesu

* **20:7** Heltaade buuru ina firta rewruude Laamdo hiraande seniinde.

¹³ Minen, min artii yaade, min naati laana yaade Asos do min njeyi nannude Pool, sabo imo anniyii yaarude toon koyde. ¹⁴ Nde min tawunduri Asos ndeen, min nanni mo laana, min njottii Mitilene. ¹⁵ Min yuwi doon e laana, min njottowii jaango muudum yeeso ruunde† Kiyos. Faabi-jaango muudum min paltoiifakkol ruunde Samos, de fabbiti-janngo mum min njottii Miletus. ¹⁶ Pool anniyii wosaade Efeesu, faa taa booya ley leydi Aasiya ndiin. Imo henyanii yottaade Urusaliima nyannde iidi 6enndal alkama si tawii na laatoo.

¹⁷ Nde Pool wonnoo Miletus ndeen, nelani hooreebe kawrital goondinbe Efeesu been. ¹⁸ Nde 6e ngarnoo ndeen, o wi'i 6e:

—Odon anndi no ngorrumi e moodon gilla nde koyn gal am naatunoo e leydi Aasiya ndi faa warde hannden. ¹⁹ Mi golliranii Joomiraado leeyinkinaare fuu, kam e gondi keewdi e torraaji di Alhuudiyankoobe umminani kam diin. ²⁰ Odon anndi mi suudaay on huunde fuu ko nafata on, mi waajake on, mi jannginii on hakkunde yimbe e ley galleiji moodon. ²¹ Mi tindinii Alhuudiyankoobe e Geresankoobe fuu tuubana Laamdo, ngoondina Joomiraado meeden Iisaa. ²² Joonin, Ruuhu Ceniido na yaara kam Urusaliima, mi anndaa ko hewtoyttoo kam toon. ²³ Ko anndumi tan, Ruuhu Ceniido oon na holla kam ley gure deen fuu ina wi'a kam geyyelle e torraaji ina ndoomi kam. ²⁴ De miin kaa, mi hiisaaki nguurndam am e maayde am fuu si mi timminii dadfurdurgol, mi he6ii

† **20:15** Ruunde wo leydi tummbiindi hakkunde maayo manngo.

yottinde gollal ngal Iisaa Joomiraado halfini kam ngaal. Gollal ngaal woni seedaade Kabaaru Lobbo haala hinney Laamdo.

²⁵ Mi yiilake hakkunde moodon, mido waajoo haala laamu Laamdo. De joonin mido anndi on nji'oytaa kam katin. ²⁶ Dum wadi de mido sappoo on hannden düm do: si tawii gooto moodon halkii, wanaa feloore am. ²⁷ Sabo mi waajake on anniyaaji Laamdo fuu, mi suudaay on fay huunde. ²⁸ Ndeenee ko'e moodon, ndeenon coggal ngal Ruuhu Ceniido halfini on faa kaybon ngaal. Laatodon duroobe kawrital goondinbe Laamdo, ngal soodiri yiyyam biyum. ²⁹ Miin, mido anndi caggal am yimbe bonbe cooroto e ley moodon hono no pobbi jolbudî, katin du dî accataa coggal ngaal. ³⁰ Fay e ley moodon danyan worþe ummiib   ina mbaajoo waajuuji fewreeji faa pooda taalibaabe been njokka d  um'en. ³¹ Dum le, kakkilon! Miccitodon, jemma e nyalooma fuu faa wadi duubi tati, mi selaay tindinirde gooto moodon fuu e gondi.

³² Joonin, mido halfina on Laamdo, e konngol hinney muudum. Konngol ngool ina waawi semmbinde on e ley goondinal mon, hokka on ko resani seniibe fuu. ³³ Abada mi muuyaay fay huunde e moodon, wanaa cardi, wanaa kanjje, wanaa kaddule. ³⁴ Onon e ko'e moodon, odon anndi juude am de kumti haajuuji am e haajuuji wondube e am. ³⁵ Mi hollii on e kabaaruuji diin fuu, sanaa ngolliron noon, mballon tampube. E ley diuum fuu, miccodon dii do haalaaji di Joomiraado meeden Iisaa haali kam e hoorem: «Kokkudo buri kokkaado barke.»

³⁶ Nde Pool tilinoo haalde dum ndeen, kam e maabbe fuu 6e kofii, 6e ndu'ii. ³⁷ Be fuu 6e mboyi bojji mawdi, 6e kippii e Pool, 6e mucpii dum. ³⁸ Ko buri mettude 6e fu, ko o wi'i 6e njii'ataa mo katin duum. Caggal duum, 6e dowti mo faa o naata laana maayo.

21

No Polyaari Urusalima

¹ Nde min ceedunoo e maabbe ndeen, min naati laana maayo, min mbosaaki, min njehi ruunde Kos. Jaango majjum, min njehi ruunde Rodosa. Min yuwi doon, min njottii wuro Patara. ² Min kebi laana peyyitooha yaade leydi Finisi. Min naati, min ndunnyi. ³ Nde min njahunoo faa min kaynii Ruunde Kipirus dakkol amin gere nano fu, min ponndii leydi Siiriya. Min njottii toon, min njippii wuro wi'eteengo Tirus.

Wo doon laana kaan jippinta gineiji muudum. ⁴ Min tawi taalibaabe, min ngondi e muubben doon balde jeddi. Ibe mbiira Pool ley Ruuhu Ceniido taa yaha Urusalima. ⁵ Nde jeddiire ndeen hiibbunoo ndeen, min ndilli. Be fuu 6e dowti min faa min njalti wuro ngoon, kambe e rewbe e sukaabe. Min kofii hunnduko maayo manngo, min ndu'ii. ⁶ Nde min mbaynundurnoo ndeen, minen kaa min naati laana, kambe du 6e njeccii cuudi maabbe.

⁷ Nde min naatunoo laana Tirus min ndilli fu, min njehi Potolemayis. Min njowtowi sakiraabe toon, min nyallidi e maabbe, min mbaali. ⁸ Jaango majjum, min ndilli doon, min njehi Kaysariya. Min naatowi suudu Filipu baajotoodo Kabaaru Lobbo oon, min njippanii dum. Wo o gooto

hakkunde subaaße njedđo Urusaliima been.* ⁹ Imo jogii biiße rewbe nayo ɓe banjaaka, haaldoobe annabaaku. ¹⁰ Nde min ngadunoo doon balde seeda fu, annabaajo bi'eteedo Agabus yuuri Yahuudiya, ¹¹ wari to amin. O hooyi kabborgol Pool, o haabbi juude makko e koyde makko. O wi'i:

—Ruuhu Ceniido wi'i: nii Alhuudiyankooбе wonbe Urusaliima been kabberta jeydo kabborgol ngol oon, ngatta dum e juude yimbe ɓe nganaa Alhuudiya'en.

¹² Nde min nannoo dum ndeen, minen e jeyaabe doon been fuu, min nyaagii Pool taa yaha Urusaliima. ¹³ Pool kaa jaabii, wi'i:

—Dume wadi de odon mboya, odon keccindina bernde am? Miin, mido segilanii ko wanaa habbeede tan, mido segilanii fay maayde ley Urusaliima saabe innde Iisaa Joomiraado.

¹⁴ Nde min paamunoo min mbaawaay waylitinde anniya makko ndeen, min celi mo, min mbi'i:

—Joomiraado wada muuyde muudum!

No Pool yottorii Urusaliima de hawriti e Yaaku-uba

¹⁵ Nde wadunoo balde seeda fu, min cegilii, de min ponndii Urusaliima. ¹⁶ Taalibaabe Kaysariya wobbe njaadi e amin, njaari min galle gorko bi'eteedo Manason faa min njippanoo dum. Manason wo jeyaado Kipirus, laatiido taalibaajo gilla ko booyi.

* **21:8** Golle Nulaaße 6.1-6, 8.5.

17 Nde min njottinoo Urusaliima ndeen, saki-raabe been njabborii min seyo. **18** Jaango majjum, min njaadi e Pool to Yaakuuba. Mawbe kawrital goondinbe been fuu ina tawaa toon. **19** Caggal ko o jowti be duum, o fillitanii be huunde fuu ko Laamdo wadani yimbe be nganaa Alhuudiyankoobe saabe golle makko. **20** Nde be nannoo dum ndeen, be njetti Laamdo. Be mbi'i Pool:

—Sakiike amin, a yi'ii Alhuudiyankoobe ujunaaje ngoondinii. Faa hannden ibe tinnii e jokkude Tawreeta Muusaa. **21** Be kaalanaama ada janngina Alhuudiyankoobe wonbe hakkunde lenyi goddi njoppa Tawreeta Muusaa, mbiidaa taa taada sukaabe mubben katin, taa njokka al'aadaaji diin katin. **22** Ndelle, noy ngadeten? Sabo tannyoral be nanan a warii. **23** Wadu ko min kaalante duum. Miden njogii do worbe nayo wadanbe Laamdo hunayeere. **24** Yaadu e maabbe, de laamnidaa hoore maa e maabbe, njobaa ko be kaani yobude duum, faa be labee. Ndeen yimbe fuu anndan ko haaletee dow maada duum fuu wanaa goonga. Be anndan aan e hoore maa ada jokki Tawreeta Muusaa. **25** Goondinbe yuurube e lenyi goddi been, min mbinndanii dum'en ndeentoo e ko hirsanaa tooruji e yiyyam e ko saadi, kam e jeenu.

26 Pool hooyi worbe been, yaadi e mubben. Jaango majjum, o laamnidaa e mubben laabal diina. O naati suudu dewal mawndu nduun, o haalani almaami'en been. O wi'si nyalaade laamnugol deen kibbii fu, mono e maabbe fuu wadanee sadaka.

No Pool nanngiraa ley suudu dewal mawndu

²⁷ Nde balde jeddi deen 6adinoo hibbude ndeen, Alhuudiyankoobe wobbe yuurube leydi Aasiya nji'i Pool e ley suudu dewal mawndu nduun. Be ummini hakkillooji yimbe been fuu, 6e nanngi mo.

²⁸ I6e peekoo, i6e mbi'a:

—Israa'iilankoobe, mballee min! O woni gorko jannginoowo yimbe e ley nokkuuje deen fuu ina liddoo yimbe lenyol meeden, ina liddoo Tawreeta meeden, ina liddoo nokku ceniido o. Joonin kaa, o waddii fay Geresankoobe e ley suudu dewal mawndu ndu. O tuuninii nokku ceniido o!

²⁹ Walaa ko 6e mbiiri noon si wanaa ko 6e njinoor Torofim Efeesunke oon ina wondi e Pool ley ngalluure ndeen. I6e cikka Pool nanniino mo e ley suudu dewal mawndu nduun.

³⁰ Jirkitaango ngoon huubi ngalluure ndeen. Yimbe ina njaltira tatteeji diin fuu. Be nanngi Pool, 6e ndaasi dum faa 6e mburtini dum suudu dewal mawndu nduun, de 6e ommbi dammbude deen wakkati oon law. ³¹ Nde 6e pilotonoo faa 6e mbara Pool ndeen, tawi hooreejo sordaasiibe oon humpitake Urusaliima fuu jiibake. ³² Wakkati oon, o hooyi sordaasiibe e mawbe mu6ben, o doggani jamaa oon. Nde yimbe been njinoo mo kanko e sordaasiibe been ndeen, celi fiyude Pool. ³³ Hooreejo oon 6attii Pool, yamiri Pool nanngee, habbiree callali didi. O yami,

—Gorko o wo moy? Dume o wadi?

³⁴ Jamaa oon ina feekoo. Bee ina yeewnoo dum, 6ee to ina yeewnoo dum to. Duko jiibiiko koon hadi mo faamude. Ndelle o yamiri Pool yaaree ley suudu sooro sordaasiibe toon. ³⁵ Nde Pool warnoo faa yeenja kalikali sooro oon, sordaasiibe

been ndonndii mo saabe nyanngere jamaa ndeen,
 36 sabo yimbe heewbe ina njokki mo ina peekoo,
 ina mbi'a:

—Ittu yonki makko!

No Pooljaaborii yimbe Urusaliima

37 Nde sordaasiibe been ngarnoo faa nanna Pool ley sooro mubben ndeen, Pool wi'i hooreejo oon:

—Ina daganoo kam mi haalda e maa naa?

Oon wi'i mo:

—Aa? Ada waawi geresankoore naa? 38 Ndelle a wanaa Misiranke gadudo muurtere ko booyaay oon naa? A wanaa gardudo e wadoobe bar-ko'e ujunaaje nayo, de njaarudaa dsum'en ley ladde naa?

39 Pool jaabii, wi'i:

—Miin, mi Alhuudiyanke dimaado Tarsus ley leydi Silisi. Ngalluure ndeen wanaa nde andaka koy. Mido nyaage ndunjanodaa kam mi haalda e yimbe been.

40 Hooreejo oon dujanii mo dsum. Pool darii e dow yeentirde ndeen, bantani yimbe been junngo. Nde 6e ndeyyininoo ndeen, o haali e ibraninkoore, o wi'i:

22

1 —Sakiraabé e baabiraabé, kettinee joonin faa mi seedanoo on mi jeyaa feloore nde njowudon dow am.

2 Nde 6e nannoo wo ibraninkoore o haaldata e ma6be fu, deyyinaare ndeen 6eydii katin. O wi'i:

3 —Wo mi Alhuudiyanke dimaado Tarsus ley leydi Silisi. Ammaa Urusaliima do mawnumi. Gamaliyel wonnoo moodibbo am. Kanko janngini

kam Tawreeta maamiraabe meeden oon faa laabi tal. Mido jinngana Laamdo hono no ngorrudon hannden on fuu ni. ⁴ Mi torrii jokkube Laawol ngool faa maayi. Mi nanngii worbe e rewbe, mi uddii dum'en ley kasu. ⁵ Almaami Mawdo e waalde Saahiibe been fuu ina ceedanoo kam, kam'en du. Wo e mubben kebumi derewol faa mi Holla sakiraabe mubben wonbe Damas been. De njahumi faa mi habbowa jokkube laawol Iisaa wonbe toon been, faa mi wadda dum'en Urusali-imma faa njukkee.

*No Pool haaliri haala tuubugol muudum
(Golle Nulaabe 9.1-19, 26.12-18)*

⁶ Woodi, mido yaha faa badiimi Damas, wakkati hakkunde naange. Wakkati gooto annoora mawdo yuuri dow kammu, yayni, fiili kam. ⁷ Caamumi e leydi, nanumi daande ina wi'a kam: «Sool, Sool, ko wadi de ada torra kam?» ⁸ Njaabiimi, mbiimi: «Aan wo a moy, joomam?» Nde mbi'unoomi noon fu, o wi'i kam: «Miin, wo mi Iisaa Nasaraatujo mo torrataa oon.» ⁹ Wondube e am been nji'i annoora oon, ammaa be nanaay daande haaldunde e am ndeen. ¹⁰ Ndeen, mbiimi: «Joomiraado, dume ngadammi?» Joomiraado wi'i kam: «Umma, yahu Damas. A haalante toon ko Laamdo anniyii ngadaa fuu.» ¹¹ Wondube e am been sowi kam, njaari kam faa ley Damas, sabo delkugol annoora ngool wumnii kam.

¹² Ananiyas wo gorko kuldo Laamdo, jokkudo Tawreeta Muusaa. Alhuudiyankoobe wonbe toon fuu ceedanii mo wo o moyyo. ¹³ O war, o darii yeeso am, o wi'i kam: «Sool, sakiike am, wumtu!» De wakkati oon ni, mbumtumi, njiimi mo. ¹⁴ O

wi'i: «Laamdo maamiraabe meeden oon subake ma faa paama muuyde muudum, faa nji'aa Pondonitiido oon, nanaa haala e hunnduko muudum. ¹⁵ Sabo aan seedantoo mo yeeso yimbe fuu ko njiidaa e ko nanudaa. ¹⁶ Joonin, dume ndoomataa katin? Umma, lootedaa lootagal batisima, de njaaforedaa lutti maa e noddude innde Joomiraado.»

¹⁷ Caggal mi yeccake Urusaliima, mido wada du'aare ley suudu dewal mawndu, de won ko njiimi e holleede. ¹⁸ Ley holleede oon mi yi'ii Joomiraado, wi'i kam: «Henya law, yaltu Urusaliima, sabo 6e njabataa seedaaku ngu ceedantodaa kam nguun.» ¹⁹ Njaabiimi, mbiimi: «Joomiraado, i6e anndi mido yahannoo ley cuudi baajordi diin fuu, mido uddannoo mido fiyannoo goondinbe ma been. ²⁰ Nde yiyyam Etiyen seedee maada oon yuppetenoo ndeen, mido darii, idum wel i kam ko o waraa duum. Miin haybannoo kaddule warbe mo been.» ²¹ Joomiraado jaabii kam, wi'i: «Yahu, mi nulete to woddi, to yimbe 6e nganaa Alhudiyanchoobe.»

No Pool wi'iri wo Romanke

²² I6e kettinanii mo faa o haali haala ka. Ndeen 6e yepti daade ma66e, 6e mbi'i:

—Ittu mo e adunaaru ndu! O haanaa wuuruude katin!

²³ I6e peekoo, i6e njiila saayaaji ma66e, i6e mbicca leydi. ²⁴ Hooreejo oon yamiri Pool yaaree ley suudu sooro mu66en doon, lamndoree piide faa 6e paama ko wadi de jamaa oon ina wulla e makko hono ni. ²⁵ Nde 6e kabbanoo mo faa 6e

piya mo ndeen, o wi'i mawdo sordaasiibe gondo doon:

—Yalla na daganoo on piyon Romanke, sakko mo saraaka naa?

²⁶ Nde mawdo oon nannoo dum ndeen, yehi to hooreejo muubben oon, wi'i:

—Ada anndi ko nesudaa wadfude naa? Gorko oon wo Romanke!

²⁷ Ndeen hooreejo oon wari to Pool, yami dum, wi'i:

—Haalanam, yalla a Romanke naa?

Pool jaabii, wi'i:

—Wo mi kam!

²⁸ Ndeen hooreejo oon jaabii, wi'i:

—Miin kaa, ceede keewde njobumi de kebumi laataade Romanke.

Pool wi'i mo:

—Miin, mi finii tawumi mi kam.

²⁹ Wakkati oon anniyiibe fiyude mo faa tilsinana mo haaltude been acciti. Hooreejo oon huli, sabo anndii Pool wo Romanke woodi haabbiino dum.

No Pool yaariraa yeeso waalde Saahiiibe

³⁰ Jaango majjum, hooreejo oon haabbiiti Pool, sabo na yidi tannyorde ko Alhuudiyankooibe been mbullitii dum. O yamiri hooreebe almaami'en e waalde Saahiiibe ndeen fuu kawrita. Caggal duum, o waddi Pool, o darni dum yeeso maabbe.

23

¹ Pool ndaari waalde Saahiiibe been, wi'i:

—Sakiraabe, wo bernde nde walaa feloore mbuurdumi yeeso Joomiraado faa yottaade nyalooma hannden o.

² Ndeen Ananiyas, Almaami Mawdo oon, yamiri darinoobe dakkol makko been piya mo hunnduko.

³ Ndeen, Pool wi'i mo:

—Laamdo fiyete, aan kokuwol dawninaangol nanndungol wo lobbol! Ada joodii faa carorodaa kam e Tawreeta Muusaa, de a luttii Tawreeta Muusaa ko njamirdaa mi fiyee duum.

⁴ Darinoobe doon been mbi'i Pool:

—Yalla a mbonkoto Almaami Mawdo mo Laamdo joyyini o naa?

⁵ Pool jaabii, wi'i:

—Sakiraabe, mi faamaayno yalla wo o Almaami Mawdo. Si goonga, mido anndi ina winndaa: «Taa mbonka hooreejo lenyol maa!»*

⁶ Pool ina anndi wobbe ley Saahiibe been wo Saduki'en, wobbe mubben du wo Farisa'en. Ndelle yeewnii semmbe hakkunde kawrital doon, wi'i:

—Sakiraabe, miin mi Farisanke, bii Farisanke. Wo saabe yowugol jikke e ummital maaybe carorteemi!

⁷ Nde o haalnoo dum ndeen, Farisa'en e Saduki'en been njeddunduri, kawrital ngaal feccii. ⁸ Sabo Saduki'en ina mbi'a ummital walaa, maleyka'en ngalaa, ruuhuji du ngalaa. Ammaa Farisa'en ina ngoondini dum fuu. ⁹ Duko koon seydii mawnude. Jannginoobe Tawreeta wobbe heedanbe Farisa'en been, na ngada kalala mawdo, ina mbi'a:

—Walaa fuu ko boni ko min nji'i e gorko o! Ina waawi taweede ruuhu naa maleyka haaldi e makko!

¹⁰ Jeddi diin mawni faa hooreejo sordaasiibe oon huli taa be ceeka Pool. Dum wadi de o yamiri

* **23:5** Wurtagol 22.27.

sordaasiibe njippoo to kawrital toon, itta Pool e juude yimbe been, njeccina düm to suudu sooro mußben toon.

¹¹ Jemma jokkudo oon, Joomiraado bangi e Pool, wi'i düm:

—Sellin bernde maa! No ceedoranidaa kam Urusaliima noon, na tilsi ceedanodaa kam ley Roma du.

No Alhuudiyankooöe mbatiri faa mbara Pool

¹² Nde weetunoo ndeen, Alhuudiyankooöe been mbati, kunii nyaamataa njarataa sanaa nde mbari Pool. ¹³ Batidinbe been ina buri worbe capande nayo. ¹⁴ Be njehi to hooreebe almaami'en e mawbe, be mbi'i:

—Min kunake hunayeere fay huunde min nyaamataa min njarataa gilla joonin, sanaa nde min mbari Pool. ¹⁵ Joonin, onon e waalde Saahiibe been, mbi'ee hooreejo sordaasiibe oon waddana on Pool. Mbi'on odon njidi faamitaade ko o haalata duum. Minen, miden cegilii faa min mbara mo gilla o yottaaki.

¹⁶ Bii sakiike Pool debbo nani ko be anniyii duum, yehi to suudu sordaasiibe toon, naati, humpiti Pool. ¹⁷ Pool noddi gooto e mawbe sordaasiibe been, wi'i düm:

—Yaaru suka gorko o to hooreejo toon, sabo won ko o yidi haalande düm.

¹⁸ Mawdo sordaasiibe oon yaari mo to hooreejo muudum toon, wi'i düm:

—Pool ommbaado oon noddi kam, nyaagii kam mi wadda suka gorko o to maa, sabo won ko o yidi haalande ma.

19 Hooreejo oon nanngi junngo makko, toowtidi e makko, de yami mo:

—Dume kaalantaa kam?

20 Suka oon wi'i mo:

—Alhuudiyankooße ndawridii. Be nanndink-into e yidubē faamitaade kabaaru Pool. Be nyaagete jaango ngaddanaa 6e Pool yeeso waalde Saahiibē ndeen. **21** Taa njabanaa 6e! Sabo ko 6uri worbē capande nayo na duppinanii mo, kunake nyaamataa njarataa si mbaraay mo. Be cegilake, iibe ndoomi yamiroore maa.

22 Hooreejo oon wi'i suka gorko oon:

—Taa haalan fay gooto yalla a faaminii kam dum.

O yoppi dum dilli.

No Pool nuldiraa Kaysariya

23 Caggal duum, o noddi mawbē sordaasiibē makko dido, o wi'i dum'en:

—Kawrunduree worbē keme dido e waddiibē pucci capande njeddo, kam e jom'en labbe keme dido. On fuu, cegilanee yaade Kaysariya wakkati yamnde jeenay jemma. **24** Cegilee pucci faa njaaron Pool e jam, to Filiki goforneer oon.

25 Hooreejo oon winndi 6ataaki ki, wi'i:

26 Miin, Kalawdiyus Lisiya, mido jowte, aan Filiki goforneer teddudo.

27 Gorko mo neldumaami o, wo Alhuudiyankooße nanngunoo dum, anniyii warude dum. Nde kumpitinoomi o Romanke ndeen, naatumi, miin e fedde sordaasiibē ndeen, ittumi mo. **28** Ngaddumi mo yeeso waalde Saahiibē maßbe, sabo mido yidi

faamude ko 6e peldi mo duum. ²⁹ Tawumi wo dow sariya maabbe tan 6e peldi mo, de dum wanaa huunde waawunde warude mo naa uddude mo. ³⁰ Caggal duum, maatumi Alhuudiyankoobe ndawridii faa mbara mo. Dum wadi de neldumaami mo wakkati oon. Mi yamirii felooße mo been du njaha to maa, pela mo toon.

³¹ Sordaasiibe been ngadi ko njamiraan duum, kooyi Pool ley jemma, njaari dum faa Antipatiri. ³² Jaango majjum, sordaasiibe yaarannoobe e koyde been njecpii to suudu muubben Urusaliima. Be njoppidi Pool e waddsiibe pucci been, njottinowa dum. ³³ Nde been njottinoo Kaysariya ndeen, kokki goforneer oon bataaki kiin, njoppi Pool e junngo makko. ³⁴ Nde goforneer oon janngunoo bataaki kiin fu, yami toy Pool jeyaa. Nde nannoo wo Silisi o jeyaa ndeen, ³⁵ wi'i mo:

—Mi nanan haala maa si felooße ma been ngarii.
O yamiri Pool doomowee to suudu Hirudus laamordu toon.

24

No Pool feldaayeeso Filiki goforneer

¹ Balde joy caggal duum, Ananiyas Almaami Mawdo oon yottii Kaysariya. Imo wondi e mawbe wobbe, kam e janngudo sariya Roma'en bi'eteedo Tertulu. Be peli Pool yeeso goforneer oon. ² Nde Pool noddanoo ndeen, Tertulu fuddi felude mo yeeso kaananke oon, wi'i:

—Filiki kaananke teddudo, wo saabe maada de min kebi jam booydo. Woodi ko moyyinaa ley

lenyol ngol du wo haybugol maada wadi. ³ Min annditii fuu ko ngadudaa, yimbe tatteeji fuu na njettire 6erde belde. ⁴ Mi yidaa joonnde ndeen juuta, de mido nyaage saabe moyyuki maa, ket-tindanodaa min seeda. ⁵ Min tawii gorko o wo daafoo wo bone sanne. Wo o gaddoowo fitina hakkunde Alhuudiyankoobe wonbe ley adunaaru fuu. O ardiido laawol Nasaraatunkoobe. ⁶ O filake tuuninde suudu dewal mawndu nduun, de min nanngi mo. [⁷ Miden njidi saraade mo sariya amin, tawi Lisiya hooreejo sordaasiibe oon ittirii mo semmbe e juude amin, yamiri felooibe mo been ngara yeeso maa.]* ⁸ Aan e hoore maa, lamndodaa mo, paamaa ko min peldi mo duum fuu.

⁹ Alhuudiyankoobe tawaabe toon been keedani kaaloowo oon, mbi'i noon jaati worri.

¹⁰ Ndeen Filiki, goforneer oon, hokki Pool laawol faa haala. Pool wi'i:

—Mido anndi wadii duubi ada saroo lenyol ngol. Dum wadi de mido seyoro jakkanaade hoore am. ¹¹ Buraa balde sappo e cidi ko ngarumi Urusaliima faa mi sujidana Laamdo. Si a taykake fu, a tawan hono noon worri. ¹² Fay gooto tawaay kam mido dukida e neddo naa mido jirkita jamaa, wanaa e ley suudu dewal mawndu nduun, wanaa e ley cuudi baajordi, wanaa e ley ngalluure ndeen. ¹³ Be mbaawaa tabintinde ko 6e peldi kam joonin duum. ¹⁴ Ammaa mido jabí yeeso maa: mido rewri Laamdo maamiraabe meeden oon e laawol ngol 6e mbi'ata feerewol ngool. Mido goondini ko winndaa e Tawreeta Muusaa

* **24:7** E dereeji booydi, goddi ngalaa aaya 7.

duum e ko winndaa e dewte annabaabe duum fuu.
¹⁵ Woodi, mido tannyori Laamdo iirtinan fonnditiibe e bonbe fuu, hono no Alhuudiyankooбе du tannyori ni. ¹⁶ Saabe duum mido tinnoo wondude e bernde nde walaa feloore yeeso Laamdo e yeeso yimbe wakkati fuu.

¹⁷ Caggal duubi keewdi, mi wartii faa mi wadana yimbe am dokke, mi itta sadakaaji. ¹⁸ Wakkati oon be tawi kam e ley suudu dewal mawndu nduun caggal ko ngadumi al'aada senagol. Mi waldaa e jamaa, mi waldaa e duko. ¹⁹ Alhuudiyankooбе wobbe yuurube leydi Aasiya wonnoobe doon, wo been kaannoo warude pela kam yeeso maa, si tawii won ko ngadumi. ²⁰ Yimbe bee do, sanaa kam'en e ko'e mubben kaala boofi di nji'i e am nde ndarinoomi yeeso waalde Alhuudiyankooбе Saahiiбе ndeen. ²¹ Be mbaawaa wiide mi wadii faa'e si wanaa konngol gootol ngol ndariimi de yeewniimi: «Wo saabe ummital maaybe wadi de mido saree hannden!»

²² Filiki oon, na anndi laawol Iisaa ngool, hanti haala, wi'i:

—Si Lisiya hooreejo sordaasiibe oon warii fu, ndeen carotoomi haala moodon ka.

²³ O yamiri mawdo sordaasiibe oon hayba Pool, de newnana dum, taa hada fay gooto e yigiraabe muudum been warude walla dum.

²⁴ Balde seeda caggal duum, Filiki wardi e deekum Alhuudiyanke bi'eteedo Durusiila. O neli Pool waddowaa, o hettindanii dum ina haala haala goondinal Iisaa Almasiihu. ²⁵ Kaa nde Pool haalannoo haala fonnditaare e nanngitaare e sariya garoowo ndeen, Filiki huli, wi'i:

—Joonin kaa heyii! Yahu. Nde kebindiimi fuu, mi nodditete.

²⁶ O miili Pool hokkan mo ceede. Dum wadi de imo noddum kile keewde faa bē njewtida.

²⁷ Nde wadunoo duubi didi fu, Porsiyus Festus loomti Filiki, laatii kaananke. Ammaa Filiki yoppi Pool e ley kasu doon, sabo na yidi welnande Alhuudiyankoobe been.

25

No Pool nyaagorii sariya muudum yaaree to kaananke Roma

¹ Balde tati caggal ko Festus wari e ley leydi ndiin dum, yuwi Kaysariya, yehi Urusaliima. ² Doon, hooreebē almaami'en e ardiibē Alhuudiyankoobe ngari to makko de peli Pool. Be nyaagii mo semmbe ³ o walla bē, o wadda Pool Urusaliima. Ko bē mbiiri mo noon dey, ifē piloo dūppinanaade dum dow laawol faa bē mbara dum. ⁴ Festus jaabii bē, wi'i:

—Pool ina uddii ley kasu Kaysariya toon. Miin e hoore am du, mi yeccoto wuro ngoon law. ⁵ Mawbē moodon ngara njaada e am Kaysariya, pela gorko oon si tawii won ko wadi.

⁶ Festus waddaay e maabē ko buri balde jee-tati naa sappo, de yeccii Kaysariya. Jaango majjum, o joodowii to sarorde toon, o yamiri Pool waddee. ⁷ Nde Pool yottinoo ndeen, Alhuudiyankoobe yuurube Urusaliima bēen piilii dum, peldi dum kulle bonde keewde. Ammaa bē mbaawaay laabinde pelooje deen. ⁸ Ndeen Pool jakkanii hoore muudum, ina wi'a:

—Mi wadaay ko boni, wanaa e sariya Alhuudiyankooбе oon, wanaa e suudu dewal mawndu nduun, wanaa e kaananke Roma mawdo oon du.

⁹ Festus ina yidi welnande Alhuudiyankooбе been. Ndelle yami Pool, wi'i:

—Ada jaba yaade Urusaliima faa mi sarowoo toon kabaaru maa oon naa?

¹⁰ Nde o yamunoo дuum fu, Pool jaabii, wi'i:

—Wo e sarorde kaananke Roma mawdo ngorumi, wo do kaanumi sareede. Mi wadaay Alhuudiyankooбе been fuu ko boni. Aan e hoore maa du, ada anndi. ¹¹ Si mi wadii ko boni, ko foti warude kam fu, mi salataako wareede. Ammaa si fay huunde e ko бe peldi kam дuum wanaa goonga fu, fay gooto waawaa wattude kam e juude мaббe. Sariya am faltake do. Wo kaananke Roma mawdo oon, kam sarootoо kam.

¹² Caggal nde Festus haaldunoo e tindinoobe дум ndeen, jaabii Pool, wi'i:

—Ada yidi kaananke Roma mawdo sare, ndelle a yahan to kaananke Roma mawdo oon!

No Pool waddiraa yeeso Agirippa e Bereniika

¹³ Balde seeda caggal дuum, Agirippa kaananke oon e Bereniika, sakiike mum debbo, ngari Kaysariya faa njowta Festus. ¹⁴ Nde бe 6ooytunoo doon balde seeda fu, Festus haalani kaananke oon haala Pool, wi'i:

—Ina woodi gorko mo Filiki yoppi do ley kasu.

¹⁵ Nde njahunoomi Urusaliima ndeen, hooreebе almaami'en e mawbe Alhuudiyankooбе kaalanii kam haala makko, nyaagii kam mi saroo mo o jukkee. ¹⁶ Njaabiimi бe: Al'aada Romankooбе jabataa saraade neddo si hawritaay e felooбе дум

been. Sanaa tawee ina fotti faa jaaboo ko feldaan duum. ¹⁷ Ndelle 6e fuu 6e ngarii do. Miin le, mi neebinaay dum fes, sabo jaango majjum njoodowiimi to sarorde toon, njamirmi gorko oon waddee. ¹⁸ Felooße mo been ndarii, kaali, de 6e ngaddaay fay feloore wootere ko nanndani kam wo bonanda. ¹⁹ Be peldii mo haala dinia mabbe, kam e gooto bi'eteedo Iisaa maaydo, mo Pool wi'ata ina wuuri. ²⁰ Woodi miin kaa, mi yi'aay fuu no njiitrammi goonga e haala kaan. Dum wadi de lamndiimi mo yalla imo jaaba saroweede Urusaliima. ²¹ Ammaa o nyaagake kabaaru makko wattee e juude kaananke mawdo oon. Ndelle njamirmi o haybee faa mi heba nel-dude mo kaananke Roma mawdo oon.

²² Agirippa wi'i Festus:

—Mido yidi hettindanaade gorko o, miin e hoore am.

Festus wi'i:

—A hettindanto mo jaango.

²³ Jaango majjum, Agirippa e Bereniika ngardi e yukkinaare mawnde, naati e ley sarordu nduun, kam'en e hooreeße sordaasiibë e mawße ngalluure ndeen. Festus yamiri Pool waddee. ²⁴ Nde wad-danoo fu, Festus wi'i:

—Agirippa kaananke e kawrital tawaabe do! On nji'ii gorko o. Alhuudiyankooße fuu pelii mo to am ley Urusaliima e do fuu. Ibe yeewnoo, ibe mbi'a o haanaa yoppeede o wuura. ²⁵ De miin e hoore am kaa, mi tawii o wadaay fay huunde ko haani warude mo. Ammaa kanko e hoore makko, o nyaagake sariya makko yaaree faa to kaananke Roma mawdo oon. Ndelle mi anniyake nel-dude

mo toon. ²⁶ Ammaa mi walaa ko mi winndana kaananke oon dow kabaaru makko. Dum wadi de ngaddumi mo yeeso moodon, e ko buri dum fuu, yeeso maada aan kaananke Agirippa. Hono nii, si en kettindake haala makko fu, mi heban ko mi winnda. ²⁷ Sabo hakkillo am jabaay neldeude kasunke to kaananke tawee hollitaay ko nanngiraa.

26

¹ Agirippa wi'i Pool:

—A hokkaama laawol. Haalu haala maa.
Ndeen, Pool banti junngom, jaabii, wi'i:

² —Agirippa kaananke, mi seyorake laamnude hoore am yeeso maa hannden ko Alhuudiyankoobe peldi kam duum fuu. ³ Ada anndi al'aadaaji Alhuudiyankoobe e haalaaji mubben fuu. Saabe majjum mido nyaage, kettindanodaa kam e munyal.

⁴ Alhuudiyankoobe fuu ina anndi no mbuur-dumi gilla mi cukalel. Ibe anndi no ngorruroomi e ley yimbe leydi am e ley Urusaliima fuu. ⁵ Ibe anndi gilla arande, si be njabii seedaade: mido jokki laawol diina amin buringol tiisude ngol, mido hii sodaa e Farisa'en. ⁶ Joonin, mi darake faa mi saree saabe mi yowii jikke am dow amaana mo Laamdo wadani maamiraabe meeden oon. ⁷ Yuwdijji meeden sappo e didi diin ina njowi jikke mubben e tabitingol amaana oon, ina ndewira semmbe jemma e nyalooma. Kaananke, wo saabe jikke o Alhuudiyankoobe peldi kam! ⁸ Ko wadi de miilidon Laamdo waawaa iirtinde maaybe?

⁹ Miin e hoore am, ley ko faltii mi tannyoriino mido haani bonnude innde Iisaa Nasaraatuuo

oon, no laatorii fuu. **10** Wo d̄um pay ngadumi Urusaliima du. Hooreebe almaami'en been kokkii kam baawde mi udda seniibe heewbe e kasu. Nde 6e caranoo faa 6e mbaree ndeen, mi yardake d̄um. **11** Mi torrii 6e kile keewde e cuudi baajordi diin fuu. Mido tilsina 6e njedda Almasiihu mo 6e ngoondini oon. Tikkere am dow ma66e ina mawnunoo sanne, faa mido tewna 6e ley gure janane, mido torra 6e.

*No Pool haaliri haala tuubugol muuđum
(Golle Nulaabe 9.1-19, 22.6-16)*

12 Wo hono nii njaarumi Damas. Hooreebe almaami'en nelii kam, kokkii kam baawde nanngude goondinbe toon. **13** Kaananke, mido wonnoodow laawol wakkati hakkunde naange, nji'umi annoora ina yuura dow kammu ina filoo kam, miin e yaadiraabe am been fuu. Annoora oon ina buri fay naange jalgude. **14** Min fuu, min caami e leydi. Wakkati oon, nanumi daande ina wi'a kam e ley ibraninkoore: «Sool, Sool, ko wadi de ada torra kam? Si ndemoori wi'ii saloto tufirgel joomum fu, 6eydan nawnaade.» **15** Njaabiimi, mbiimi: «Aan wo a moy, joomam?» Joomiraado wi'i: «Miin, wo mi lisaat mo torrataa oon. **16** Umma dara, sabo mi banganii ma, mi subake ma faa ngollanaa kam. Wo faa ceedanodaa kam ley ko njiidaa joonin e ko nji'oystaa si mi bangii e maa caggal hannden. **17** Mi reenete e Alhuudiyankoob6e e yimbe lenyi goddi 6e nulammaami e mu66en joonin been. **18** Mi nulete faa peertaa gite ma66e, 6e yuwa e nimre, 6e ngarta e annoora, 6e yuwa e baawde Seydaani, 6e ngarta e Laamdo, 6e keba

yaafeede hakkeeji maabbe, 6e ndonida e seniibe saabe ko 6e goondini kam duum.»

¹⁹ Ndelle saabe majjum, kaananke Agirippa, mi salaaki dowitzanaade ko nji'umi, ko yuurani kam dow kammu duum. ²⁰ Be artiimi waajaade wo yimbe Damas e yimbe Urusaliima e pilol Yahuudiya fuu. Caggal duum, njokkinmi yimbe lenyi goddi tuuba, ngarta e Laamdo, ngolla golleeji kollooji tuubii. ²¹ Saabe duum, Alhuudiyankooбе nanngiri kam ley suudu dewal mawndu nduun, pilii warude kam. ²² Ammaa Laamdo wallii kam illa ndeen faa warde hannden. Mido seedanoo yimbe fuu, gilla lo'ube faa e teddube. Mi waa-jataako fay huunde si wanaa ko annabaabe e Tawreeta Muusaa mbi'i warowan duum. ²³ Dum woni: Almasiihu torroto faa maaya, de artoo maaybe ummitaade. De si ummitake fu, waajoto yimbe meeden e lenyi goddi fuu kisindam, dam laatanoo 6e annoora.

²⁴ Nde Pool haalannoo dum ndeen, Festus feekii e semmbe, wi'i:

—Pool, a haanjaama! Heewgol maada anndal ngol haanjii ma!

²⁵ Pool jaabii, wi'i:

—Festus teddudo, mi haanjaaka. Ko kaalammi duum wo haalaaji goongaaji, celludi. ²⁶ Agirippa kaananke oon ina anndi kulle deen. Dum wadi de mido hoolii haalude dum yeeso makko. Si goonga, mido tannyori dum fuu suudanaaki mo, sabo dum wadaay e cuncukka. ²⁷ Kaananke! Ada goondini annabaabe naa? Mido anndi ada goondini!

²⁸ Agirippa wi'i Pool:

—Ada miilii wadude kam Almasiyankeejo law
law hono nii naa?

²⁹ Pool jaabii, wi'i:

—Nde yaawi e nde hanndii fuu, dsum laatoo muuyde Laamdo faa aan e hettindaniibe kam joonin fuu laatodon hono am, de tawee wanaa e callali gondi e am di.

³⁰ Kaananke oon e goforneer oon e Bereniika e joododinoobe e mubben fuu ummii. ³¹ Nde be njaltunoo suudu nduun ndeen, iibe mbi'undura:

—Gorko o wadaay ko foti warude dsum naa haabude dsum callali.

³² Agirippa wi'i Festus:

—Imo waawnoo yoofeede si o wi'aayno sariya makko faltiniree to kaananke Roma mawdo oon.

27

No Pool neldiraa Roma

¹ Nde yaareede amin Itali e laana tabitinnoo ndeen, Pool e kasunkoobe wobbe ngattaa e junngo mawdo sordaasiibe bi'eteedo Yuliyus. Oon wo jeyaado e fedde sordaasiibe kaananke Roma mawdo. ² Min naati laana maayo yuuruka Adaramati njahooha ina fanta gure ley leydi Aasiya. Min ndunnyi. Miden ngondi e Aristarka gorko Makedoniyanke yuurudo Tesaloniiki. ³ Jaango majjum, min njottii Sidon. Yuliyus wadani Pool hinney, dunjanii dsum yaha to yigiraabe mum faa mballira dsum ko haajaa. ⁴ Nde min yuwunoo doon ndeen, min 6attitowii fonngo ruunde* Kipirus, sabo min kawrii e henndu mawndu. ⁵ Min peyyiti

* **27:4** Ruunde wo leydi tummbiindi hakkunde maayo manngi.

maayo manngo ngoon hedde Silisi e Pamfiliya, min njottii Mira ley leydi Lisiya. ⁶ Doon, mawdo sordaasiibe oon tawi laana yuuruka Alesandiri ina fonndii Itali. O nanni min ley makka.

⁷ Balde keewde laana amin kaan wadi ina yaara heese. Semmbe e doole min njottorii wuro Kinidus. Henndu nduuun na hada min yahude to min ponndii. Ndelle min takkii ruunde Kereta gere to henndu walaa, min panti Salmone. ⁸ Miden takkii senngo, miden tampi e yaade. Faa min njottii nokku bi'eteedo Jipporde Lobbere nde woddaa e wuro Lasiya.

⁹ Min booyi sanne faa wakkati iidi nyannde ittugol hakkeeji faltii. Wakkati dabbunde maayo ngoon ina hulbinii sanne, na tiidi laana dilla ndeen. Pool tindini 6e dow majjum. ¹⁰ O wi'i:

—Sakiraabe, mi yi'ii jahaangal ngal wo keewun-gal torra e mursey, wanaa laana ka e gineeji di tan, ina waawi laataade yonkiji meeden du.

¹¹ Ammaa mawdo sordaasiibe oon, wo haala sofeere laana kaan e joomiika buri jabude e dow haala Pool. ¹² Jipporde laanaaji nde 6e ngoni e muudum ndeen, welaa dabbude. Dum wadi de burbe heewude ley laana been mbi'i 6e njaha 6e piloo yottaade Fenika faa 6e ndabba toon. Dum wo jipporde wonnde Kereta huccitinde horfoore-gorgaare e sobbiire-gorgaare.

¹³ Nde henndu seeda yuurundu horfoore fuufunoo wifude ndeen, 6e cikki 6e mbaawan yottaade to 6e njidi toon. Be yeentini jamde darnooje laana deen, 6e takkii e fonngo Kereta, ibe njaha. ¹⁴ Ammaa caggal duum seeda, henndu mawndu wi'eteendu henndu sobbiire-lettugaare

yuuri to ruunde toon, jippii. ¹⁵ Henndu nduun faddii laana kaan. Min kunngii huccitinde e henndu nduun faa min njaha yeeso. Min acci ika roya. ¹⁶ Nde min paltotonoo duungel bi'eteengel Kawda ndeen, min kawri e henndu seeda. E ley tampiri, min poodi laanayel pamarel ngel min ndaasannoo ngeel. ¹⁷ Min yepti ngel, min njowi ngel dow laana mawka. Ndeen be kooyi boggi, be piili laana mawka kaan. Be njippini jamde darnooje laana deen du, be njoppi ika roya, sabo be kulii taa be njanoy e soobundu ruunde Sirta. ¹⁸ Henndu nduun ina heddi na wifa min semmbe. Saabe duum, jaango majjum be pussdi faddude donngal laana kaan ley maayo manngo. ¹⁹ E nyalooma tatabo oon, be kooyi anniya, be paddi fay ginereeji jaarooji laana ley ndiyam diin. ²⁰ Naange e koode du nji'ataake faa wadi balde keewde. No henndu nduun foti mawnude, min tayi jikke amin fuu e hisude.

²¹ Nde booynoo yimbe been kebaay ko nyaama fu, Pool darii hakkunde maabbe, wi'i:

—Si on njabiino haala am, on ndillaayno Kereta fu, torraaji di e mursey o hewtataakono en. ²² Joonin, mido haalana on: cellinee berde mon, sabo fay gooto moodon mursataa yonki muudum, laana ka tan mursetee. ²³ Jemma hankin, Laamdo jeydo kam mo ndewammi oon nuli maleyka to am. ²⁴ Maleyka oon wi'i kam: «Pool, taa hulu, tilay a daroto yeeso kaananke Roma mawdo oon. Laamdo reenete, aan e yaadiraabe maa been fuu.» ²⁵ Ndelle, cellinee berde mon, sabo mido hoolii ko Laamdo haalani kam duum, hono noon jaati worrata. ²⁶ Ammaa tilay en njanowan e ruunde

wonnde ley maayo ngo.

²⁷ E ley jemma sappo e nayaabo oon, miden ndoya ley maayo Adiriyati ngoon faa hannden. Wakkati hakkunde jemma, donneobe laana kaan been cikki 6adake leydi. ²⁸ Be paddii boggol pondirgol, 6e tawi luggeefi kiin wo haddi darande noogay. Be njehi yeeso seeda, 6e paddi katin, 6e tawi luggeefi kiin wo haddi darande sappo e joy.[†] ²⁹ Be kuli taa 6e njanoy e kaaye. Ndelle 6e njippini jamde nay darnooje laana deen caggal laana kaan, ibe keppi weetaay. ³⁰ Ndeen gollooobe laana kaan been njippini laana pamara kaan e ndiyam, ina njidi faa ndilla kam'en tan. Be mbi'i wobbe 6e njippinowan jamde to yeeso laana kaan toon faa ndarna ka. ³¹ Pool wi'i mawdo oon e sordaasiibe been:

—Si yimbe been kettaaki e ley laana ka fu, onon, on ndadataa.

³² Ndeen sordaasiibe been tayi boggi nann-gunoofi laana pamara kaan diin, njoppi ngel dilli kangel tan.

³³ Nde 6adinoo weetude ndeen, Pool nyaagii 6e fuu 6e nyaama, wi'i:

—Hannden woni balde sappo e nay odon ndoomi on nyaamaay. Odon keddii on meedaay fay huunde. ³⁴ Ndelle mido nyaagoo on sanne, nyaamon. Odon kaajaa dum faa ndadon. Si goonga, fay gooto moodon lee6ol hoore muudum solataa de saama.

³⁵ Nde o haalnoo dum ndeen, o hooyi buuru, o yetti Laamdo yeeso ma6be 6e fuu, o heltii, o

[†] **27:28** Darande noogay wo meetereeji 37. Darande sappo e joy wo meetereeji 27.

fuddi nyaamude. ³⁶ Ndeen be fuu berde mabbe cuusinaa, kambe du be kooyi, be nyaami. ³⁷ Minen wonbe ley laana kaan seen, min yimbe keme dido e capande njeddo e njeegom. ³⁸ Nde be nyaamnoo faa be kaari ndeen, be kooyi bootooji alkama gondi e laana kaan diin, be paddi di ley maayo manngo faa dum huyfintina ka.

³⁹ Nde weetunoo ndeen, be kaynii leydi, de be annditaay ndi. Be nji'i nokkuure njaareendi yaajunde seeda. Ibe njidi yaarude toon laana kaan si be mbaawii. ⁴⁰ Be tayi jamde deen, be njoppi de ley maayo. Be kabbiyi boggi kabbaadi e ooncirde deen du. To hoore laana toon du, be yeentini wudere dow, be peerti nde faa henndu nduun dunyira ka yeeso. Be ponndii daande maayo ngoon. ⁴¹ Ndeen laana kaan fiyii e tilde, nufi. Beccce makka cokkii e ley njaareendi ndiin faa ka hunngii dimmbaade. Bempeyye du keli caggal makka faa diggi.

⁴² Sordaasiibe been anniyii warude kasunkooobe been taa fay gooto e mubben yinoo de dogga. ⁴³ Ammaa mawdo sordaasiibe oon ina yidi dan-nude Pool. Ndelle o hadi be wadude anniya mabbe oon. O yamiri waawbe yinaade been artoo njinoo mburtowoo, ⁴⁴ de heddiibe been du tiigoo kelte laana kaan naa godsum yuursum e makka. Hono nii min fuu min njottorii leydi e jam.

28

¹ Nde min kisunoo ndeen, min nani ruunde ndeen Malta wi'etee. ² Jeyaabe doon been njaborii min caahu mawdo. Wakkati oon kammu ina toba, jaangol du na woodi. Ndelle be kubhani min yiite faa min yuuloo. ³ Pool hawrunduri ledde, watti

e yiite ngeen. Nguleefi wurtini mboddi e majje, ndi soppi junngo makko. ⁴ Nde jeyaaþe doon been njiiñoo mboddi ndiin ina bilii e junngo Pool ndeen, mbi'unduri hakkunde muþben:

—Tannyoral, gorko o wo gaddo war-hoore. Fay si o dadi to maayo manngo toon du, sariya accataa mo o wuura.

⁵ Ndeen o fiðfi mboddi ndiin ley yiite, ðum torraay mo fay huunde. ⁶ Be miilii o buutan naa o saaman wakkati oon, o maaya. Ammaa nde be kedino faa booyi, be njii'i ðum torraay mo fay seeda fu, hakkillooji maþbe mbaylitii e makko. Be mbi'i o wo gooto e alla'en.

⁷ Pubiliyus, hooreejo ruunde ndeen oon, gese muudum ina ngoni sera nokkuure ndeen. O jaþbii min faa woodi, o weerni min faa haddi balde tati, o saahanii min. ⁸ Tawi baaba Pubiliyus ina fukkii sellaa, wo jontaado, reedu muudum du na dogga yiyyam. Pool yehi to makko, du'ii, yowi juude muudum e dow makko, danni mo. ⁹ Nde ðum wadunoo ndeen, nyawþe wonþe e ruunde ndeen been ina ngara, na ndannee. ¹⁰ Be teddini min teddeengal manngal. Nde min cegilinoo faa min ndilla e laana ndeen, be njoobini min ko min kaajaa e jahaangal amin.

No Polyáari yuuwde Malta yaade Roma

¹¹ Miden ngonnoo toon faa haddi lebbi tati. Ndeen min naati e laana yuuruka Alesandiri, ndab-bunooka e ruunde ndeen. Min ndilli. Laana kaan ina ñenyaa ñenyi tooruucci funereeþe.* ¹² Min njottii wuro wi'eteengo Sirakus, min ngadi doon balde

* **28:11** E jamaanu oon, dorbotooþe laanaaji na mbi'a kanji ndeenata ðum'en.

tati. ¹³ Min yuwi doon, min takkii e daande maayo manngo faa Regiyus. Jaango majjum, henndu hordore wifi. E ley balde didi min njottii Potiyoli. ¹⁴ Min tawi toon sakiraabe, nyaagii min min ngonda e mudden jeddiire. Ndeen sakinii, min njottowii Roma. ¹⁵ Nde sakiraabe wonbe Roma been nannoo garol amin fu, ngari faa Luumo Abiya e nokku bi'eteedo Jipporde Tati faa njakkitoo min. Nde Pool yiinoo be ndeen, yetti Laamdo, beydorii cuusal. ¹⁶ Nde min njottinoo Roma ndeen, Pool hokkaa laawol jippoo e feere muudsum. Sordaasi-ijo ina hayba dum.

No Pool waajorii ley Roma

¹⁷ Balde tati caggal duum, Pool noddi mawbe Alhuudiyankoobe. Nde be kawritinnoo ndeen, o wi'i be:

—Sakiraabe! Mi wadaay fay huunde ko luttundurta kam e yimbe meeden naa aadiiji maamiraabe meeden. Ammaa mi nanngaama Urusaliima, mi wattaama e juude Romankoobe. ¹⁸ Been du yamtindake kam, de ihe muuyunoo yoppude kam, sabo be tawraay kam fay sabaabu gooto kaando warude kam. ¹⁹ Ammaa saabe Alhuudiyankoobe been calake mi yoppee, dum waddani kam nyaagaade sariya am faltiniree to kaananke Roma mawdo oon. Mi walaa fuu ko mi felda lenyol am. ²⁰ Dum wadi de noddumi on faa mi yi'a on, mi haalana on. Mido habborii callali di saabe mo Israa'ilankoobe kedii garol muudsum oon.

²¹ Be mbi'i mo:

—Min kebaay bataaki yuuruki Yahuudiya kaaloohi haala maa. Katin du fay gooto e sakiraabe been waraay humpiti min naa haalani

min ko boni ko ngadudaa. ²² Ammaa miden njidi kaalanaa min ko njiidaa e hakkillo maa, sabo miden anndi yimbe nokkuuje fuu na njedda laawol ngol njokkudaa ngool.

²³ Be kakkunduri nyalaande nde 6e ngartoya. Nyalaande ndeen yottii, heewbe ngari kawriti to jipporde makko toon. Gilla fajiri faa caggal ki-raade imo fiirtana 6e haala laamu Laamdo, imo waajoo 6e. Imo holla 6e kabaaru Iisaa gondo ley Tawreeta Muusaa e ley dewte annabaabe. ²⁴ Wobbe mabbe njabi ko o haali duum, wobbe njabaay. ²⁵ Nde 6e cankitotonoo ndeen tawi 6e ndewraay hakkunde mabbe. Ndeen Pool 6eydi konngol gootol, wi'i:

—Ruuhu Ceniido haalii goonga nde haalnoo e hunnduko annabi Esaaya, wi'i maamiraabe moodon:

²⁶ «Yahu to lenyol ngol, mbi'aa dum:

On nanan faa wooda, de on paamataa.

On ndaaran faa laaba, de on nji'ataa.

²⁷ Sabo lenyol ngol 6ernde muudum yoorii.

Be cukkii noppi mabbe, 6e mubbii gite mabbe. Si wanaa noon fu gite mabbe nji'an, noppi mabbe nanan,

hakkillooji mabbe paaman.

Ndeen 6e ngartan 6e ndewa kam

de mi danna 6e.»†

²⁸ Pool 6eydi katin, wi'i:

—Anndee, kisindam Laamdo nuldaama yimbe 6e nganaa Alhuudiyankoo6e. Kambe 6e kettindoto! [²⁹ Nde Pool haalnoo haalaaji diin ndeen,

† ^{28:27} Esaaya 6.9-10.

Golle Nulaaße 28:30

cii

Golle Nulaaße 28:31

Alhuudiyankoobe been ndilli ina njeddundura
sanne hakkunde mußen.]‡

³⁰ Pool joodii suudu to luwi toon duubi didi
kiibudi. Imo jaaboo waroobe ndaarude mo been
fuu. ³¹ Imo waajoo laamu Laamfo. Imo jannginira
tannyoral kabaaru Iisaa Almasiihu Joomiraado,
walaa fuu ko hadi mo.

‡ **28:29** E dereeji 6ooydī, goddi ngalaa aaya 29.

Fulfulfe Burkina, Dewtere Laamdo Amaana Keso

Fulfulde Burkina New Testament

copyright © 2012 SIM International

Language: Fulfulde Burkina (Fulfulde, Western Niger)

Dialect: Burkina

Translation by: SIM International

Fulfulfe Burkina, Dewtere Laamdo Amaana Keso

This translation, published by SIM International, was published in 2012. If you are interested in obtaining a printed copy, please contact the SIM (Mission Protestante), BP 1552, Ouagadougou 01, BURKINA FASO.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

 You must give Attribution to the work.

 You do not sell this work for a profit.

 You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not sell this work for a profit.

 You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

civ

PDF generated using Haiola and XeLaTeX on 11 Nov 2022 from source files
dated 29 Jan 2022
c32b76d2-ab0d-5ad5-a698-b4140754fcc2